

DIZRA' CHAWE' CA NACA CHEĒ JESUCRISTO DA BZUAJ SAN MATEO

*La benne' ca' gulaque' xra gula cheē Cristo
(Lc. 3.23-38)*

¹ Da caní zaj naca na la cheē benne' zaj naque' xra wdé cheē Jesucristo. Jesús nigá nababe' zri'ine zre sua David, ne zri'ine zre sua Abraham.

² Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

³ Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

⁴ Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

⁵ Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

⁶ Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.

⁷ Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

⁸ Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

⁹ Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

¹⁰ Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

¹¹ Josías nigá guque' xra Jeconías ne benne' biche'
ca' ca lu zra ca' gate benne' Babilonia
guleché'e benne' Israel ca' lu xezr la xu
Babilonia.

¹² Jeconías nigá guque' xra Salatiel.

Salatiel nigá guque' xra Zorobabel.

¹³ Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

¹⁴ Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

¹⁵ Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

¹⁶ Jacob nigá guque' xra José, benne' chee' María,
xrna Jesús, Bénnea' naque' Cristo.

¹⁷ Caní naca, gulaca chidá' cue' bènneache gate
guzú lau zua Abraham, ca bzrinte zra zua David,
na' gulaca xechidá' cue' bènneache ca' gate guzú
lau zua David, ca bzrinte zra gate na' benne' Ba-
bilonia ca' guleché'e benne' Israel ca' lu xezr la xu

chee', na' gulaca xechidá' cue' bénneache ca' gate guzú' lau zra na', ca bzrinte zra gulaj Cristo.

Ca guca gate gulaj Cristo
(Lc. 2.1-7)

¹⁸ Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zue' zi'i ne chee xel-la' waca chee Be' Lá'azxa chee Dios.

¹⁹ José, benne' chee María nigá, naque' benne' xrlátaje. Quebe guca lazre' gulé'ene' ca ba naca chee María lau benne' xezre ca'. Guca lazre' gusane' le' bagácheze. ²⁰ Dxácatę dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le':

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios.

²¹ Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bénneache lu dul-la da zaj nabague'.

²² Xúgute da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'. ²³ Caní gunné':

Tu nú'uladau' gúadaube' sanbe' tu bidu biu cheebe', na' xelu'e labe' Emanuel.

Emanuel zéaje na: Dios zúalene' dxi'u.

²⁴ Ca bebán José, na' bene' cáteze gunná gubáz chee Xránadxu, na' guzí' lu ne'e María chee gácabe' zru'ule'. ²⁵ Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

2

Dxeleżrín benne' sina ca' lu xezre Jerusalén

¹ Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa beleżrín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. ² Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judío ca'? Gate zuantu' chalá'a naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

³ Ca guneze Herodes, benne' wenná bea, da nigá, na' guzúe' stebe, ne cá'anqueze guca chee xúgute benne' zaj zre'e Jerusalén. ⁴ Nadxa Herodes, wenná bea na', btupe' xúgute benne' xíchaje chee bxruze ca', ne benne' dxuluxuzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

⁵ Benne' caní gulé'e le':

—Lu xezre Belén da nababa xezr la xu Judea, lawe' da bzuaj caní tu benne' bchálaje' waláz chee Dios, gate na' gunné':

⁶ Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa ládujla benne' ca' dxelenná be'ene' xezr la xu Judá nigá, lawe' da ládujla bénneache chiu' dxuaj tu benne' nna be'e, na' guxúequeze' bénneache chia', benne' Israel.

⁷ Nadxa Herodes, wenná bea na', bláwizre' bagácheze benne' sina gula ca', na' gunábene' le'

bátala ble'e lau belaj na' belelé'ene'. ⁸ Nadxa gusel-le' benne' ca' chjaque' xezre Belén, ne guzre' le':

—Le chjaca na', ne le naba xanne' chee bidu na', na' ca cheajxrácale-be', na' le guzén neda' chee cha'a neda' gúe lá'ana gúe szrena'-be'.

⁹ Ca bexuzre belén benne' sina gula ca da gunná Herodes, wenná bea, nadxa besía'que', na' belaj da belelé'ene' gate zaj zre'e chalá'a naga dxalaj gubizra zeaj na' lau le', na' bzrinte na, ne guzúa na naga zua bidu na'. ¹⁰ Gate benne' sina gula ca' belelé'ene' belaj na', nadxa gulebéle'ene'. ¹¹ Ca gulu'e lu xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana dxelúe szrene' bidu na'. Nadxa gulesálaje' xua chee' ca', ne bulunézruje'-be' oro, ne xalaj zixre, ne mirra da naca na zichaj. ¹² Ca gudé na', Dios guzre' benne' ca' lu bchigala québedxa xelexedée' naga zua Herodes. Chee le na belexequé'e neza xula, belexezrine' lazrie'.

Ca guca beleché'e Jesús lu xezr la xu Egipto

¹³ Ca gudé besí'aca benne' sina gula ca', nadxa tu gubáz chee xabáa, gubáz chee Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xezr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee gutie'-be'.

¹⁴ Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. ¹⁵ Gulezré'e na' ca bzrindxa zra gute Herodes. Caní guca ca naca da gunná Xránadxu lu dxu'a

benne' bchálaję' waláz chee', gunné': "Xuláwizra' bi biu chia' cheę xedxúajbe' lu xęzr la xu Egipto."

Dxenná be'e Herodes benne' ca' xelútię' bidu biu ca'

¹⁶ Gate gúquebe'e Herodes gulezí xę benne' sina ca' le', na' bzrá'ale'e, ne gunná bé'ene' benne' ca' xelútię' xúgute bi biu dxé'enedau', ca zrinte bidu ca' ba zaj zua chup iza, bidu ca' zaj zrabe' xęzre Belén, ne bidu ca' zaj zrabe' lu xęzredu ca' zaj naxechaj na xęzre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'. ¹⁷ Ca'an guca ca da bzuj Jeremías, bënnea' bchálaję' waláz cheę Dios ba guca zan' iza, gunné':

¹⁸ Guca tu schaga lu xęzre Ramá.

Guca webezre, ne gulebezre xache'.

Raquel na' dxebézrele'e cheę bi chee' ca'.

Québequeze dxaca lazre' xexaca zrene'

lawe' da ba gulate bi chee' ca'.

¹⁹ Ca gudé gute Herodes, na' tu gubáz cheę xabáa, gubáz cheę Xránadxu ble'e lawe' José lu bchigala naga zuę' Egipto, na' guzre' le':

²⁰ —Guxásache. Beche'e bidu chiu' nigá, ne xrnabe'. Bexíaj lu xęzr la xu Israel, lawe' da ba gulate benne' ca' gulaca lazre' xelútię' bidu nigá.

²¹ Nadxa guxasa José, na' beche'e bidu na', ne xrnabe', na' belexzrine' lu xęzr la xu Israel. ²² Ca guneze José dxenná bea Arquelao naga nababa Judea waláz cheę xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz cheę xabáa le' lu bchigala.

²³ Ca bezrine' na', na' bexíaje' cheajxęzúe' lu xęzre

Nazaret. Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

3

*Juan dxegu'e lban le'e xixre' lawe' lataj
(Mr. 1.1-8; Lc. 3.1-9, 15-17; Jn. 1.19-28)*

¹ Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea. ² Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

³ Juan nigá naque' bénnea' bchalaj Isaías chee'. Isaías bchálaje' waláz chee Dios gate bzuaje' caní: Dxene chi'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga té'e'.

⁴ Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzína'dau' chee' bézudau'. ⁵ Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán. ⁶ Ca gulexrúalepe' dul-la chee', Juan nigá bchue' benne' ca' nisa lu xegu Jordán.

⁷ Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnajle da ba xa' da za'? ⁸ Le gun da xrlátaje da xelunna bea

na ba bebí'i lázrele. ⁹ Quebe guéquele lale, dxennale le'eze: "Nalatu' lawe' da nácantu' xrtia Abraham." Neda' dxapa' le'e: Dios waca xexune' xiaj caní zri'ine xrtia Abraham. ¹⁰ Le'e nácale ca xaga ca'. Xia waga bache nalá na chee chugu na xaga ca', na' xúgute xaga ca' quebe dxelebía na da zixre chawe' welechugue na, na' xelexe na lu xi'. ¹¹ Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ni'e. ¹² Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee na, na' xuzrá chawe' zrua' xtila na' lu da'a chee na, san guzezxe' xizre na' lu xi' da quebe xexula na.

Da guca gate gudxúa Jesús nisa

(Mr. 1.9-11; Lc. 3.21-22)

¹³ Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee guchúe' Le' nisa. ¹⁴ Nédxute Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

¹⁵ Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan bene' ca'. ¹⁶ Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee Dios dxétaje' ca tu gugú chíchidau',

zeajsúaba' lawe Jesús. ¹⁷ Nadxa ben tu chi'i lu be',
gunné':

—Benne' nigá naque' Zrí'inequeza' nazrí'ite
lazra'. Dxezaca ba lázreḷena' Le'.

4

*Dxaca lazre' da xriwe' gun na бага Jesús zria
(Mr. 1.12-13; Lc. 4.1-13)*

¹ Nadxa Be' Lá'azxa chee Dios la guché'te' Jesús
le'e xixre' lawe' lataj naga gúe lazre' da xriwe' gun
zréaje na Le'. ² Quebe bi gudagu Jesús chua zra
chua xela, na' ca gudé na' gudune'. ³ Nadxa da
xriwe' bzrin na naga zua Jesús chee gun zréaje na
Le', na' dxḷ na Le':

—Che Lue' nacu' Zri'ine Dios, gunná be'e xiaj
caní xelexaca na xeta xtila.

⁴ Jesús bechebe':

—Lu xiche chee Dios dxenné': “Quebe gaca ban
nu benne' gawe' xétaze, san nen xúgute dizra' chee
Dios gaca bane'.”

⁵ Nadxa da xriwe' guché na Jesús lu xezre lá'azxa
Jerusalén, na' bzua na Le' xíchajte xudau', ⁶ na'
guzre na Le':

—Che Lue' nacu' Zri'ine Dios, guxrite' nigá, lawe'
da dxenná lu xiche chee Dios:

Dios nna bé'ene' gubáz chee xabáa chee' ca'
chee xelácalene' Lue'.

Welexechise' Lue' nen ne'e
chee quebe gunu' zi' ni'u lu xiaj ca'.

⁷ Na' gunná Jesús:

—Cá'anqueze dxenná lu xiche chee Dios, dxé'e
bénneache: “Quebe guchínenu' Xranu' Dios cáteze
dxaca lazru'.”

⁸ Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nrita lu xezr la xu, ne ca naca xel-la' guni'a chee na. ⁹ Na' gunná da xriwe', dxé na Le':

—Xúgute da caní gunna' chiu' che guzú zribu' gucá'ana szrenu' neda'.

¹⁰ Nadxa Jesús guzre' na:

—Bexíaj, da xriwe', lawe' da dxenná Dios lu xi-che chee', dxé'e bénneache: “Bca'ana szren Xranu' Dios, ne be lá'ana tuze Le'.”

¹¹ Nadxa da xriwe' becuasa na lau Jesús, na' belezrín gubáz chee xabáa chee Dios, ne bu-lunézruje' da dxechine Jesús.

Dxuzú lau Jesús dxuchálaje' xrtizra' Dios naga nababa Galilea

(Mr. 1.14-15; Lc. 4.14-15)

¹² Gate ben Jesús xu'u Juan lizre xia, na' bezé'e zexíaje' naga nababa Galilea. ¹³ Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. ¹⁴ Caní guca ca da bzuaj Isaías, benne' bchálaje' waláz chee Dios, gunné':

¹⁵ Lu xezr la xu chee Zabulón, ne chee Neftalí, naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán. Naga nababa Galilea, naga zaj zra' benne' quebe zaj naque' judío.

¹⁶ Bénneache zaj zra' lu da chul-la belelé'ene' tu da dxusaníle'e na, na' benne' zaj zra' naga xu'u zrul-la chee xel-la' gute ba bsaní' tu xi' naga zaj zre'e.

17 Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios lu xezr la xu nigá.

Jesús dxuláwizre' tapa benne' wezén bela

(Mr. 1.16-20; Lc. 5.1-11)

18 Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tue' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzale' xixruj bela chee' lu nisa.

19 Nadxa Jesús dxē'e benne' caní:

—Le gun neda' tuze, na' guna' le'e benne' gutúpale chia' bēneache ca dxunle dxezenle bela.

20 La bulucá'anate' xixruj chee' ca', na' zjácálene' Jesús.

21 Xelátēdauze gusá'aque', na' ble'e Jesús xechupa benne'. Tue' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxelexún chawe' xixruj chee'. Jesús bláwizre' le', 22 na' la bulucá'anate' da dxedá lawe' nísadau' na', ne xre', na' zjácálene' Jesús.

Jesús dxusédenē' bēneache naga nababa Galilea

(Lc. 6.17-19)

23 Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bēneache lu xu'u ca' naga dxulucá'ana szren benne' judío ca' Dios. Na' dxegu'e lban ca nna bea Dios, ne dxexune' xúgute benne' ca' ca zaj naca xízrawe' cha chee'.

24 Ca'an guca, xúgute benne' chee' xezr la xu Siria belenne' ca da dxun Jesús, na' belezrine' lau Jesús,

zaj naché'e benne' wə' ca', benne' zaj xu'e xízrawe', ne benne' zaj zue' lu xel-la' dxudía, ne benne' zaj xu'e be' xriwə', ne benne' zaj xu'e chuna', ne benne' zaj naxrú'uniə' bine, na' bexún Jesús xúgute benne' caní. ²⁵ Zjácale benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

5

Lban da bchalaj Jesús tu lu xi'a

¹ Gate ble'e Jesús xúgute benne' zan ca' zá'aque' naga zue', nadxa guluéne' tu lu xi'a, ne gudxé'e na'. Nadxa benne' ca' dxusede Jesús beledube' cuite'.

² Nadxa guzú lau Jesús dxusédenə' benne' ca'.

Nu benne' naca chee' tu da ba neza (Lc. 6.20-23)

³ Gunná Jesús:

—Da ba neza zrente naca na chee benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

⁴ 'Da ba neza zrente naca na chee benne' ca' dxelelé'elə' zaj zue' lu da baxache' lawe' da zaj nabague' dul-la. Dios dxexúe zrene' benne' caní.

⁵ 'Da ba neza zrente naca na chee benne' zaj naque' zren lazre'. Benne' caní xelezí'e chee' xezr la xu da nachebe lazre' Dios gunézruje' benne' caní.

⁶ 'Da ba neza zrente naca na chee benne' du lazre' dxelaca lazre' xelune' da naca xrlátaje lau Dios. Dios gácalene' benne' caní.

⁷ 'Da ba neza zrente naca na chee benne' dxelex-exache lazre' benne' xula. Dios wexache lazre' benne' caní.

⁸ 'Da ba neza zrente naca na chee benne' ca' zaj xu'u xichaj lázrdawe' da xrlátaje. Benne' caní welelé'ene' Dios.

⁹ 'Da ba neza zrente naca na chee benne' dxele-beza zri lazre' nen bénneache. Dios guzúe' le' ca bi cheéqueze'.

¹⁰ 'Da ba neza zrente naca na chee benne' dxeledée' xel-la' zi' lu na' benne' ca' dxelune' chee' da calela cate' dxelune' da xrlátaje. Benne' caní zaj naca chee' xelexú'e naga dxenná bea Dios xabáa.

¹¹ 'Da ba neza zrente naca na chee le'e che benne' dxelenné' schanni' chee, ne dxelune' chee da calela, ne dxelenné' chee xúgute' dizra' wen lazre' lawe' da nácale chia' neda'. ¹² Le be, ne le xezaca ba lázrele lawe' da wazile tu da zrente da gunna Dios le'e xabáa. Caní gaca na lawe' da cá'anqueze caní guláu zi' xuzre' benne' ca' bu-luchálaje' waláz chee Dios, benne' ca' gulezré'e nédxudxa ca le'e.

*Nácale ca zede', ne ca tu xi' lu xezr la xu
(Mr. 9.50; Lc. 14.34-35)*

¹³ Na' gunná Jesús:

—Le'e nácale ca zede' chee bénneache lu xezr la xu nigá. Che zede' nigá xenite xel-la' sna'a chee na, ¿ájazra gácalele bénneache ca'? Québedxa gaca guchínedxu zede' caní. ¡Chú'unadxu na, na' xululéaj bénneache le na!

14 'Le'e nácale ca tu xi' chee bēneache zaj zře'e xezr la xu. Tu xezre da zua na tu lu xi'a, quebe gáchequeze na. 15 Gate guzálajdxu tu xi', quebe gudúsedxu na. Guzúadxu na sibe naga gusení na chee xeledé'e xúgute benne' zaj zře'e lu xu'u. 16 Cá'anqueze le gun le'e. Le güe lataj gusení xi' da nácale lau bēneache ca' chee xeledé'ene' ca da xrlátaje da dxunle. Nadxa xelúe lá'ane' Xrale Dios zue' xabáa.

Da bchalaj Jesús ca naca chee da nadxixruj bea Dios

17 Gunná Jesús:

—Quebe dxal-la' guéquele le'e za'a neda' chee cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz chee Dios. Quebe za'a chee cua' na. Za'a chee gulé'eda' cáteze zéaje na. 18 Da li dxapa' le'e. Dxácatē zaj zua xabáa, ne xezr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgute ca da dxal-la' gaca na. 19 Chee le na', che tu benne' guzúe' chalá'ala bítetezla da nigá da bdxixruj bea Dios, láqueze naca na tu da dauze, ne che guzéajni'ine' bēneache chee xelúnqueze' ca', benne' nigá xegá'ane' cá'aze naga dxenná bea Dios xabáa. Bēnea' guzúe' dizra' da nadxixruj bea nigá, ne gulé'ene' bēneache chee xelúnqueze' ca', benne' nigá wegá'anaqueze' ba lá'ana naga dxenná bea Dios xabáa. 20 Dxapa' le'e, che quebe gunle da nácadxa xrlátaje ca da dxelún benne' ca' dxulux-uzájle'e da nadxixruj bea Dios, ne ca da dxelún

benne' xudau' fariseo ca', cabata' xexú'ule le'e naga dxenná bea Dios xabáa.

*Da bchalaj Jesús ca naca chee xel-la' dxezrá'a
(Lc. 12.57-59)*

²¹ Na' gunná Jesús:

—Le'e ba bénele ca gulenná xrtíale gula ca': “Quebe gútele benne',” na' “Núteteze benne' gutie' benne' waxíaje' chee cuía xi'e.” ²² Neda' dxapa' le'e, núteteze benne' dxezré'e le sa' ljwezre' waxíaje' chee cuía xi'e. Na' bènea' dxenné' schanni' chee le sa' ljwezre' waxíaje' lau benne' chee xu'u lawe' blau, na' xuludée' le' chee cuía xi'e. Bènea' dxenné' chee le sa' ljwezre' tu dizra' sban, benne' nigá nácaqueze chee' chéaje' lu lataj ba xa'.

²³ 'Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru', ²⁴ bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

²⁵ 'Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudée' lue' lau bènea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudée' lue' lu na' benne' dxusézxujé' bènea' ca' lizre xia, na' xelegú'e lue' lizre xia na'. ²⁶ Da li dxapa' lue'. Quebe xedxúaju' na' che quebe quízruju' xúgute da dxebagu' chee benne' na'.

*Da bchalaj Jesús ca naca chee benne' dxíchaje'
xrba chee xel-la' nuchaga na'*

²⁷ Na' gunná Jesús:

—Le'e bache b́enquezele ca gulenné' nédxute: “Quebe gunu' dul-la da dxichaj na xrba chee xel-la' nuchaga na'.” ²⁸ Neda' dxapa' le'e, ńuteteze benne' ne'e tu nu'ula, ne sa lazre' le', báchequeze bene' dul-la nen nu'ula na' lu xichaj lázrdawe'.

²⁹ 'Che xiaj lau' da zua xabela dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bel-la' dxen chiu' quézcala chu'u lataj ba xa' dute bel-la' dxen chiu'.

³⁰ Che na'u da zua xabela chiu' dxuzúa na lue' lu dul-la, guchugu na, ne gudxú'una na zitu'. Nácadxa chawe' nite late' da naca na chee bel-la' dxen chiu', quézcala chu'u lataj ba xa' dute bel-la' dxen chiu'.

Jesús dxusédené' ca naca chee benne' dxexelé'e nen zru'ule'

(Mt. 19.9; Mr. 10.11-12; Lc. 16.18)

³¹ Na' gunná Jesús:

—Cá'anqueze gulenné' nédxute: “Ńuteteze benne' dxexelé'e nen zru'ule', dxal-la' gunézruje' nu'ula na' tu xiche da dxulé'e na belexelé'e.” ³² Neda' dxapa' le'e, che tu benne' dxexelé'e nen zru'ule', na' nu'ula nigá quebe guzúalene' benne' xula, benne' chee nu'ula nigá dxuzúe' le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

Jesús dxusédené' ca naca chee benne' dxucá'ana lie' xrtizre'

³³ Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da

nachebe lazru' nen dizra' bca'ana liu' lau Xránadxu Dios.” ³⁴ Neda' dxapa' le'e: Quebe dxal-la' guzétjale xabáa chee guca'ana lile dizra' chee, lawe' da naca na naga dxe' Dios, ³⁵ ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee Benne' Blau naque' Wenná Bea. ³⁶ Quebe guzétjale xíchajle chee guca'ana lile dizra' chee lawe' da quebe séquele gunle da chiche, ne da gasaj netú xicha xíchajle. ³⁷ Le nnaze: “Awe’,” u le nnaze: “Cabí,” lawe' da gate tu benne' dxudadxe' chee' chee da nigá, naca na chee da xriwe'.

Dxulé'e Jesús ca naca chee nu benne' dxexebéaj lazre'

(Lc. 6.29-30)

³⁸ Na' gunná Jesús:

—Le'e ba bénele ca da gulenné' nédxute: “Che tu benne' cuéaje' xiaj lau', cá'anqueze gunu' chee', ne che cuéaje' lazxu', cá'anqueze gunu' chee'.” ³⁹ Neda' dxapa' le'e, quebe tíl-lalele nu benne', san che tu benne' gu'e chala'a xragu', be' lataj gu'e xechalá'a xragu'. ⁴⁰ Che tu benne' gaca xúzre'lene' lue', ne dxaca lazre' cue' zrau', be' lataj xúate' xicha chiu'. ⁴¹ Che dxulusebágu'e lue' gu'u xua chee' tu cuéndau', bia na chupa cuenla. ⁴² Che núteteze benne' bi dxenabe' chiu', bnézruje' na, ne quebe guzagu' ca gunézruju' chee nu benne' bi dxenabe' chite.

Jesús dxusédené' ca dxal-la' zri'idxu benne' ca' dxeledábague' dxi'u

(Lc. 6.27-28, 32-36)

⁴³ Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábague' lue'.” ⁴⁴ Neda' dxapa' le'e, le zri'i benne' ca' dxeledábague' le'e. Le naba gaca chawe' chee benne' dxelenné' cheele. Le gun da chawe' chee benne' dxelecuídene' le'e. Le naba lau Dios gaca chawe' chee benne' dxelenné' schanni' cheele ne dxelune' cheele da calela. ⁴⁵ Che gunle caní gácale bi cheéqueze Xrale zue' xabáa, lawe' da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxelune' da calela. ⁴⁶ Che nazrí'ile tuze benne' zaj nazrí'ine' le'e, ¿ájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. ⁴⁷ Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios. ⁴⁸ Le gaca benne' xrlátaje cáteze naca Xrale zue' xabáa, naque' xrlátaje.

6

Dxulé'e Jesús ca naca da xrlátaje da dxelún bènneache

¹ Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' cheele lau bènneache chee xeledé'ene' na. Che ca'an dxunle, na' Xrale Dios zue' xabáa québequeze bi gunne' le'e. ² Chee le na', gate lue' dxácalenu' benne' dx-elexájrjene', quebe guzennu' xúgute bènneache ca da dxunu', ca dxelún benne' ca' dxelune' xrlátaje

cúzreze la neza, ne lu xu'u naga dxulucá'ana szren benne' judío ca' Dios. Dxelunē' da caní chee xelenné bēneache xrlátaje chee'. Da li dxapa' le'e, ba déqueze lazruj chee'. ³ Gate lue' gunézruju' late' chee benne' dxelexázrjene', ben na luéze chee quebe neze le sa' ljwezru'. ⁴ Ben da caní bagácheze, na' Xrau' Dios, Bēnea' dxelé'ene' ca da dxunu' bagácheze, Le' gunne' lazruj chiu'.

Jesús dxusédene' ca dxal-la' gundxu xel-la' dxuláwizra Dios

(Lc. 11.2-4)

⁵ Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelunē' xrlátaje cúzreze. Dxeledánene' dxelunē' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, chee xelélé'e bēneache da dxelunē'. Da li dxapa' le'e, ba déqueze lazruj chee'. ⁶ Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalene' lue' naga zu' tuzu'. Nadxa Xrau' Dios, Bēnea' dxelé'ene' ca da dxunu' bagácheze, Le' xuzri'e chiu'.

⁷ Gate dxuláwizru' Dios dxuchálajlenu' Le', quebe tuz ca da nneu' zánete lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxelennéle'e. ⁸ Quebe gunle ca dxelún benne' ca', lawe' da Xrale Dios ba nézquezne' ca da dxechínnele le'e nédxula ca za nábale na. ⁹ Chee le na', le guláwizra Dios nnale caní:

Xrantu' Dios, zu' xabáa,

gaca lá'azxaqueze Lau'.

¹⁰ Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',
cáteze dxaca xabáa.

¹¹ Benna netu' da gáguntu' na'a.

¹² Bnite lau cheentu' ca naca da calela da bentu',
ca netu' ba bnite launtu' chee benne' belune'
cheentu'
da calela.

¹³ Quebe gu'u lataj nu gun zréaje netu',

2 san bselá netu' lu na' da xriwe'.

Naca chiu' gápaquezu' xel-la' dxenná bea,
ne xel-la' waca,

ne da xabáa chadía chacanna. ¡Ca'an gaca na!

¹⁴ 'Che le'e gunité laule chee benne' belune'
chee da calela, na' Xrale Dios zué' xabáa gu-
nite lawé' chee le'e. ¹⁵ Che le'e quebe gunité
laule chee benne' ca', na' Xrale Dios quebe gunité
láuqueze' chee le'e ca naca dul-la da nabágale.

Jesús dxusédené' ca dxal-la' gundxu gubasa

¹⁶ Na' gunná Jesús:

—Gate le'e dxunle gubasa, quebe guzúale bax-
ache' laule ca dxelún benne' dxelune' xrlátaje
cúzreze. Benne' caní dxelune' ca' chee xeelé'e
bénneache le' dxelune' gubasa. Da li dxapa' le'e,
ba déqueze lazruj chee benne' ca'. ¹⁷ Lue', gate
dxunu' gubasa, bza xíchaju' chawe', ne gudibe
lau', ¹⁸ chee quebe xeléquebe'e bénneache dxunu'
gubasa. Tuze Xrau' Dios na', Bénnea' zúalene' lue'
naga zu' tuzu', Le' dxennátequeze', na' gunné' da
naca na chiu'.

Jesús dxusédene' chee da gunní'a chee xabáa
(Lc. 12.33-34)

¹⁹ Na' gunná Jesús:

—Quebe gutúpale da gunní'a lu xezr la xu nigá, naga guteba' na, ne da ca' dxelebía xi na, na' xelú'u gubán ne xeleané' na. ²⁰ Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xeleque na, na' québequeze xelú'u gubán chee xelegué'e na. ²¹ Naga nuzrale da gunní'a chee, na' zúaqueze lázrdaule.

Jesús dxusédene' chee tu xi' da xú'udxu
(Lc. 11.34-36)

²² Na' gunná Jesús:

—Xiaj laule zaj naca na ca tu xi' chee bel-la' dxen chee. Che xiaj laule zaj naca na chawe', duté ca naca bel-la' dxen chee naxaní'. ²³ Che xiaj laule quebe zaj naca na chawe', duté ca naca bel-la' dxen chee nachul-la na. Cá'anqueze che xi' da xu'ule xexaca na tu da chul-la, chúl-lalé'edxa súaquezle.

Jesús dxusédene' chee Dios, ne chee da gunní'a
(Lc. 16.13)

²⁴ Na' gunná Jesús:

—Netú benne' quebe séquene' guzúa cuine' lu na' chupa xrané', lawe' da wazré'e tu xrané' ne wazrí'ine' xetúe', u wéquene' ba lá'ana tu xrané' na' xetúe' guzúe' chalá'ala. Quebe séquele guzúa cuinle lu na' Dios, ne lu na' da gunní'a.

Jesús dxusédene' ca dxun Dios, dxuxúe' xúgute bi chee' ca'
(Lc. 12.22-31)

25 Na' gunná Jesús:

—Cheē lē na' dxapa' le'e, quebe cue'le gunne xue ga sa' da gágule da xí'ajle cheē gaca banle, ne ga sa' zra lánale da gácule. Zácadxa xel-la' nabán cheēle ca da dxágule, ne zácadxa bēl-la' dxen cheēle ca zra lánale. ²⁶ Le nna'xque bxínnedu ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zue' xabáa dxunézruje' da dxeláguba'. Zácadxale le'e ca bxínnedu ca'. ²⁷ ¿Nuzra benne' ládujla le'e gaca gusetunna cuine' xate' lawe' da dxe'e gunne xue?

²⁸ '¿Bizr cheē na' dxe'le le'e gunne xue cheē zra lánale? Le nna'xque ca dxelegula xiaj ca' zaj zē le'e xixre'. Quebe dxelún na zrin, ne quebe dxelache na du. ²⁹ Dxapa' le'e, Salomón benne' wenná bea na' quebe gucue' ca da xrtan cheē xiaj caní, na' le' gúta'le'e chee' da gunní'a. ³⁰ Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelezxe na lu xi', quegá gundxe' da chawe' cheēle le'e, benne' québetē ca dxeajlí lazre'. ³¹ Cheē lē na', quebe cué'tecale gunne xue, nnale: “¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?” ³² Cheē da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgutē da dxechínnele. ³³ Zria laudxa cuele gunne xue cheē nna bea Dios lu xichaj lázrdaule, ne cheē gunle da xrlátaje da xezaca ba lazre' Dios, na' sile xúgutē da ca' dxechínnele. ³⁴ Quebe cuele gunne xue na'a da naca na cheē wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

7

Jesús dxusédene' chee benne' dxuchi'e da dxun le sa' ljwezre'

(Lc. 6.37-38, 41-42)

¹ Na' gunná Jesús:

—Quebe guchi'ale da dxelún le sa' ljwézrele chee quebe guchi'a Dios caní chee le'e. ² Le' guchi'e chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e. ³ ¿Bizr chee na' dxená'u bébedau' da xu'u xiaj lau le sa' ljwezru', ne quebe dxená'u da zrente da xu'u na xiaj láuquezu' lue'? ⁴ ¿Ájazra gunu' xu'u le sa' ljwezru': “Benna lataj xebéaja' bébedau' da xu'u xiaj lau”, che da zrendxa xu'u xiaj láuquezu' lue'? ⁵ Lue', benne' dxun xrlátaje cúzreze. Bebéaj nedxu da zrente da xu'u xiaj láuquezu', na' gaca le'enu' cháwedau' xebéaju' bébedau' da xu'u xiaj lau le sa' ljwezru'.

⁶ Quebe gunézrujle da naca lá'azxa chee benne' dxeluné' ca dxelún becu' snia, checa xelexéchaje', ne xuluzúzrue' le'e. Quebe guzúale da zaca chee lau benne' dxeluné' ca dxelún cuche, dxuluchuchuj dxululéajba' da dxugágule-ba'.

Dxuchalaj Jesús ca dxal-la' nábadxu, ne xexílajdxu, ne nñedxu dxu'a dxa xu'u

(Lc. 11.9-13; 6.31)

⁷ Na' gunná Jesús:

—Le naba, na' Dios gunne' na chee le. Le xilaj na, na' xezrélele na. Le nne dxu'a dxa xu'u, na' sáluje' chee le. ⁸ Le gun caní lawe' da benne' bi dxenabe', dxezi'e na. Benne' bi dxexílaje', dxeajxraque' na,

na' benne' dxenné' dxu'a dxa xu'u, zua nu benne' sáluje' chee'.

⁹Netule le'e quebe gunézrujle zrí'inele tu xiaj che lebe' dxenábabe' le'e tu xeta. ¹⁰Quebe gunézrujle zrí'inele tu bela' snia che lebe' dxenábabe' le'e tu bela. ¹¹Che le'e, benne' wen da calela, nézele gunézrujle zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

¹²'Le gun chee le sa' ljuwézrele ca dxaca lázrele le'e xelún lebe' chee. Da nigá naca da nadxixruj bea na Moisés, ne da dxenná na lu xiche naga naxúaj da gulenná benne' ca' buluchálaje' waláz chee Dios.

*Jesús dxusédené' chee dxa xu'u lechide'
(Lc. 13.24)*

¹³Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'. ¹⁴Dxa xu'u lechide', ne neza lase zaj naca naga zjaca benne' xelezí'e xel-la' nabán da zeajlí canna, na' bábaze benne' dxelexezrelne' na.

*Naca bea tu xaga ne chee da zixre dxebía na
(Lc. 6.43-44)*

¹⁵Na' gunná Jesús:

—Le guxúe cuínale chee benne' wen lazre' ca', benne' dxelenné' zaj naque' benne' dxuluchálaje' waláz chee Dios. Benne' caní zá'aque' naga zrle le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a. ¹⁶Le'e xúnbeale le'

ne chee da dxelune'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'. ¹⁷ Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. ¹⁸ Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. ¹⁹ Xúgute xaga zrinnaj welechugue na, na' xelezxe na lu xi'. ²⁰ Ca'an naca, le'e xúnbeale benne' ca' ne chee da ca' dxelune'.

Quegá xúgute benne' xelu'e naga dxenná bea Dios xabáa

(Lc. 13.25-27)

²¹ Na' gunná Jesús:

—Quebe xelu'e naga dxenná bea Dios xabáa xugute benne' ca' dxelé'e neda': “Xrana', Xrana'.” Welú'u tuze benne' ca' dxelune' ca da dxaca lazre' Dios zue' xabáa. ²² Ca zrin zra na', benne' zante xelé'e neda': “Xránantu', Xránantu', netu' bchálajntu' ne chee Lau' Lue', ne bchíntentu' Lau' bebéajntu' be' xriwe' ca', ne nen Lau' Lue' bénle'entu' xel-la' waca ca' chee xabáa.” ²³ Nadxa neda' xápaqueza' benne' ca': “Quebe núnbe'a le'e. Le cuasa cuita' neda', le'e, ba benle da calela.”

Jesús dxusédené' chee chupa lane xu'u

(Lc. 6.47-49; Mr. 1.22)

²⁴ Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre. ²⁵ Guca xiuj, na' bdxuaj guba'u, ne guxasa be' bdunu' chee xuluzría xi na xu'u na', san quebe guzré'e na lawe'

da xu'u lane na lu xiaj xre. ²⁶ Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' bene' tu lizre' lu xu dxeze. ²⁷ Guca xiuj, na' bdxuaj guba'u ne guxasa be' bdunu' chee xuluzría xi na xu'u na', na' chadite guzré'e na, ne guzría xite na.

²⁸ Ca bexuzre bchalaj Jesús, na' belexebanne benne' ca' ca naca da bsédenē', ²⁹ lawe' da dxusédenē' benne' ca' ca tu benne' nape' xel-la' dxenná bea, ne quegá ca dxelún benne' ca' dxulux-uzájle'e da nadxixruj bea Dios.

8

Dxexún Jesús tu benne' dxuzru lu xpele'

(Mr. 1.40-45; Lc. 5.12-16)

¹ Gate bexetaj Jesús lu xi'a na', benne' zante zjácaleñe' Le'. ² Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

³ Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexácatē' ca naca xízrawē' chee'. ⁴ Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xeelé'e benne' ca' ba bexacu' na'a.

Dxexún Jesús bi wen zrin chee tu benne' dxenná be'e lu wedil-la

(Lc. 7.1-10)

⁵ Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene'

benne' ca' dxjaque' wedil-la, na' guta' xuene' Le',
 6 dxe'e Le':

—Xran, bi wen zrin chia' debe' lizra'.
 Naxrú'ünebe' bine, ne dxezácale'ebe'.

7 Jesús dxe'e le':

—Wazá'a xexuna'-be'.

8 Benne' dxenná be'e na' gunné':

—Xran, quebe naca chia' chu'u lizra'. Cun
 gunneze, na' xexaca bi wen zrin chia'. 9 Caní
 waca gunu' lawe' da zua benne' dxenná bé'ene'
 neda', ne cá'anqueze neda' dxenná be'eda' benne'
 ca' dxjaque' wedil-la. Gate dxapa' tube': “Guxíaj”,
 na' dxéajbe'. Na' gate dxapa' bi xula: “Gudá”, na'
 dxídabe'. Na' gate dxuchíneda' bi wen zrin chia'
 chee bi da gunbe', na' dxunbe' na.

10 Gate bene Jesús da nigá, bebánene', na' guzre'
 benne' ca' zjácále' Le':

—Da li dxapa' le'e, ládujla benne' Israel quebe
 nu ne xezrelde', benne' dxéajle'e chia' ca dxun
 benne' nigá. 11 Neda' dxapa' le'e, zá'aca benne'
 zante' chalá'a naga dxalaj gubizra, ne xechalá'ala
 naga dxebía gubizra, na' xelebé'e tu zren xelawe'
 nen Abraham, ne Isaac, ne Jacob naga dxenná bea
 Dios xabáa. 12 Benne' ca' gucá'a zga'ale Dios chee
 xelu'e naga dxenná bea Le', guzale' benne' ca' lataj
 chul-la naga xelebezre', ne xeláguxa'ate' lazxe'.

13 Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácatē bi wen zrin chee'.

Dxexún Jesús xrna zru'ule Pedro
(Mr. 1.29-31; Lc. 4.38-39)

14 Guxíaj Jesús lizre Pedro, na' blé'ene' xrna zru'ule' de' lu da'a, xu'e da la. 15 Xeajté' ne'e, na' bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne' ca'.

Dxexún Jesús benne' zante benne' we'
(Mr. 1.32-34; Lc. 4.40-41)

16 Ca guzríá gubizra, na' belezrín benne' zante lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéaje' be' xriwe' ca', ne bexune' xúgute benne' we' ca'. 17 Da nigá guca na ca da gunná Isaías, benne' bchálaje' waláz chee Dios, gunné': "Le' bequé'e xízrawe' ca' da nápadxu, ne gubague' ca da dxezácadxu."

Dxelaca lazre' benne' chjácálene' Jesús
(Lc. 9.57-62)

18 Gate na' ble'e Jesús benne' zante zaj naxéchaje' Le', na' guzre' benne' ca' dxusédene' gulelague' xechalá'a nísadau' tu lu da dxedá lawe' nisa. 19 Na' bzrin lau Jesús tu benne' dxuxuzájle'e da bdxixruj be'e Dios, na' dxé'e Le':

—Benne' Wesede, dxaca lazra' sálēna' Lue' gáteteze chéaju'.

20 Na' Jesús guzre' le':

—Beza' zaj zua bluaj cheeba', na' bxinne zaj zria xrú'uneba', san neda', Benne' Gulje' Bénneache, ne naga xrua xíchaja' quebe ga zua.

21 Bzrin xetú benne' naque' benne' ba bsédequeze Jesús, na' guzre' Le':

—Xran, benna neda' lataj xexá'a nedxu chee cheajxecacha' xra'.

22 Nadxa Jesús guzre' le':

—Gudálen neda'. Be' lataj benne' gate ca' xulucache ljwezre'.

Dxebeque zri Jesús be' bdunu', ne xeajxruza chee nísadau'

(Mr. 4.35-41; Lc. 8.22-25)

²³ Nadxa guxú'u Jesús lu da dxedá lawe' nísadau', na' benne' ca' dxusédene' belune' Le' tu zren. ²⁴ Na' guzú lau dxaca tu be' bdunu' lawe' nísadau', na' xeajxruza chee nísadau' guxú'u na lu da dxedá lawe' nísadau' na', dxácatē dxase Jesús. ²⁵ Nadxa benne' ca' dxusédene' bulusebane' Le', na' dxelē'e Le':

—Xránantu'. Bselá netu'. Ba dxázentu' lu nisa.

²⁶ Jesús guzre' le':

—¿Bizr chee na' dxezrébele'e? Nácale benne' látega dxelejílí lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite na. ²⁷ Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dizra' chee'.

Benne' Gadara zaj xu'e be' xriwe'

(Mr. 5.1-20; Lc. 8.26-39)

²⁸ Gate bezrín Jesús xechalá'a nísadau' na' lu xezr la xu chee benne' Gadara, na' chupa benne' biu belexedxúaje' lu bluaj chee benne' gate, na' belezrine' lau Jesús. Dxúpatē benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedé'e la neza na'. ²⁹ Na' gulezú lawe' dxelebézrexe'e. Dxelenné':

—¿Bizr chee na' za'u naga zúantu', Jesús, Zri'ine Dios? ¿Za'u nigá chee gusaca zi'u netu', ne quebe ne zrin zra?

³⁰ Tu chi na' zra tu cue' cuche dxeláguba'. ³¹ Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benna lataj chea-jchú'untu' lu cuche ca'.

³² Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute cuche ca' belezázruba' tu dxu'a xi'a zren, na' xea-jlecházeba' lu nísadau' naga gulázeba' nisa, na' guláteba'.

³³ Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca guca xúgute da caní, ne ca guca chee benne' ca', belexedxúaj be' xriwe' zaj xu'e.

³⁴ Nadxa xúgute benne' zaj zre'e lu xezre na' beledxúaje', ne belezrine' naga zua Jesús. Na' ca belezé'ene' Le', gulata' xuene' Le' xezé'e lu xezr la xu chee'.

9

Dxexún Jesús tu benne' zaj zua zri ni'a ne'e

(Mr. 2.1-12; Lc. 5.17-26)

¹ Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. ² Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléajle'e chee', na' gunné', dxé'e benne' we':

—Ben dipa lazru', zrí'ina'dau'. Dul-la chiu' dxu-nite lawa'.

³ Nadxa bal-la benne' dxuluxuzájle'e da nadx-ixruj bea Dios gulenné' lu xichaj lázrdawe': “Benne'

nigá dxucá'ana dítajē Dios nen xrtizre'." ⁴Lawe' da neze Jesús ca gulenné' lu xichaj lázrdawē', na' dxē'e benne' ca', gunné':

—¿Bizr chee na' dxennale caní lu xichaj lázrdaule? ⁵¿Bízrala da quebe nácadxa stēbe guna? ¿Nnia': "Dul-la chiu' ba bnite lawa'", u che nnia': "Bexasa, guzá?" ⁶Chee le na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunite lawa' dul-la.

Nadxa dxē'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

⁷Bénnea' zaj zua zri ni'a ne'e bexase', na' zexíajte' lizre'. ⁸Gate belelé'e bénneache da nigá, na' belezrebe', ne belúe lá'ane' Dios lawe' ba bnézruje' xel-la' waca caní chee bénneache.

*Jesús dxuláwizre' Mateo
(Mr. 2.13-17; Lc. 5.27-32)*

⁹Ca bezá Jesús na', na' blé'ene' tu benne' biu le' Mateo, dxē'e lataj naga dxuchízruje' waláz chee xezre Roma, na' dxē'e le', gunné':

6 —Bēn neda' tuze.

Nadxa Mateo nigá guxase' zéajlene' Jesús.

¹⁰Gate na' dxē' Jesús dxawē' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawē' cuita Jesús, ne benne' ca' dxusédenē'. ¹¹Benne' xudau' fariseo ca', gate belelé'ene' da nigá, dxelé'e benne' ca' dxusede Jesús, gulenné':

—¿Bizr chee na' Benne' dxusédenē' le'e dxágulene' benne' wechizruj ca', ne benne' wen da zrinnaj ca'?

12 Jesús benne' da nigá, na' dxē'e benne' ca', gunné':

—Quebe dxelechine benne' chawe' nu benne' dxexunē' bēneache. Benne' wē' dxelechínē' lē'.
 13 Le chjaca, le cheajsēde ca da dxenná da naxúaj na lu xiche cheē Dios, dxenné': "Neda' dxaca lazra' xexache lázrele le sa' ljuwézrele, quegá gútele bē xíxre'du ca' lu cugu chia'." Bla' neda', quegá cheē guláwizra' benne' xrlátaje. Dxuláwizra' benne' dul-la cheē xelexebí'i lazrē'.

Jesús dxusédene' ca naca cheē gubasa
 (Mr. 2.18-22; Lc. 5.33-39)

14 Nadxa belezrín lau Jesús benne' ca' dx-eledálēnē' Juan, bēneea' dxuchúē' bēneache nisa, na' gulēnábene' Lē':

—¿Bizr cheē na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

15 Na' Jesús dxē'e benne' ca', gunné':

—¿Ájala cheē na' xelezúa ba xácheze benne' zaj zuē' laní cheē wechaga na' dxácatē zua benne' wechaga na' nen lē'? Wazrín zra gate dua benne' wechaga na'. Nadxa xelúnqueze' gubasa.

16 'Quegá nu dxudá tu ladxe' cube lē'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'. 17 Cá'anqueze quebe nu benne' quē'e xrise uva wal-la cube lu bzude xide gula lawe' da che ca'an gunē', gate cue' chi'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Cheē lē na' dxal-la'

ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpatē na.

Bchalaj Jesús da caní ca naca chee benne' ca' dxelezí' lu ne'e xrtizre'.

Dxexún Jesús bi nu'ula chee Jairo, ne nu'ula', xeajté'e zra lana Jesús

(Mr. 5.21-43; Lc. 8.40-56)

¹⁸ Dxácatē na' dxuchalaj Jesús da nigá, na' bzin tu benne' xíchajē chee benne' judío ca', na' bzu zribe' lau Jesús, dxenné':

—Bi nu'ula chia' za gútetēbe'. Che Lue' xidu' ne guzé na'u lebe', wexaca banbe'.

¹⁹ Na' guxasa Jesús, guxíajlene' le' nen benne' ca' dxusédene'. ²⁰ Nadxa bzin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajté'e zra lana Jesús. ²¹ Dxenné' lu xichaj lázrdawe': "Che cheajtaza' zra lanē', na' xexaca'."

²² Jesús guxéchajē', guné'e nu'ula', na' dxē'e le':

—Ben dipa lazru', zrí'ina'dau'. Bache bexacu' lawe' da dxéajle'u chia'.

La bexácatē nu'ula na'.

²³ Gate na' bzin Jesús lizre benne' xíchajē chee benne' judío ca', na' blé'ene' zaj zra' benne' wil-la xulucache' bi nu'ula na', ne benne' zaj zre'e dxelunē' zralaj. ²⁴ Gunná Jesús, dxē'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'. ²⁵ Gudé bebéajē' benne' ca', na' guxú'u Jesús, ne béxrue' na' bi nu'ula na', na' guxásabe'. ²⁶ Du ca naca xezre ca' bzriluj dizra' chee da ben Jesús.

Dxexún Jesús chupa benne' la chul-la

27 Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

28 Ca guxú'u Jesús lu xu'u naga zúaquezē', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

29 Nadxa Jesús gudane' xiaj lau benne' ca', dxenné':

—Gaca chee le ca dxéajlele.

30 Belexaca xiaj lawē'. Nadxa Jesús gunné' xuene' benne' ca', gunné':

—Le guxúe xanne' chee quebe nu neze da nigá.

31 Gate beledxúaje', na' buluchálaje' du ca naca xezre ca' ca da ben Jesús chee'.

Dxexún Jesús tu benne' quebe dxaca nnie'

32 Ca bezá' Jesús nen benne' ca', na' belezrín bal-la benne' zaj naché'e tu benne' biu quebe dxaca nnie', benne' xu'e be' xriwe'. 33 Cáteze bebéaj Jesús be' xriwe' nigá, na' benne' quebe dxaca nnie' bezú lawē' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

34 Benne' xudau' fariseo ca' gulenné':

—Benne' nigá dxebéaje' be' xriwe', dxuchínene' xel-la' waca chee da xriwe', da na' dxenná be'e na be' xriwe' ca'.

Dxexache lazre' Jesús bèneache ca'

³⁵ Gudé Jesús tu tu xezre zren, ne tu tu xézredau', dxusédenē' benne' ca' lu xu'u ca' naga dxulucá'ana szrenē' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bēneache zaj nape' tu tu cue' xízrawe' ca da dxelezaque'.

³⁶ Gate ble'e Jesús bēneache ca', na' bexache lazre' le' lawe' da zaj zre'e xácheze', ne dxelecuán lazre'. Zaj naque' ca zřila' ca' quebe zua benne' guxúe'-ba'. ³⁷ Nadxa guzre' benne' ca' dxusédenē':

—Da li, da zrente de da lápadxu, na' bábaze benne' wen zrin zaj zre'e. ³⁸ Chee le' na' le naba lau Xrana lina nigá, sel-le' benne' wen zrin xelexape' lina chee'.

10

Dxecá'a Jesús chazrinnu benne' xelaque' gubáz chee'

(Mr. 3.13-19; Lc. 6.12-16)

¹ Nadxa Jesús bláwizre' chazrinnu benne' ca' dxusédenē', na' bnézruje' le' xel-la' dxenná bea chee' xelexebéaje' be' xriwe' ca', ne chee' xelexex-une' bēneache zaj xu'e' tu tu cue' xízrawe' ca da dxelezaque'.

² Caní zaj le' chazrinnu benne' gubáz ca' chee' Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

³ Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechizruj chee' xezre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

⁴ Xetúe' le' Simón, benne' dxe'e gunne xue chee xezr la xu Israel.

Xetúe' le' Judas Iscariote, bénnea' gudée' Jesús lu na' benne' dxeledábague' Le'.

Dxesel-la Jesús benne' gubáz chee' ca' cheajlezenne' bénneache xrtizre'e

(Mr. 6.7-13; Lc. 9.1-6)

⁵ Nadxa gusel-la Jesús benne' chazrinu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xezre ca' zaj nababa Samaria. ⁶ Le chjaca naga zaj zra' benne' Israel zaj naque' ca zrila' zaj naníteba'. ⁷ Le chjaca cu'ule lban, xele bénneache ba bzrin gáguze zra nna bea Dios lu xezr la xu nigá. ⁸ Le xexún benne' zaj xu'e we' guzru', ne benne' bila xízrawe' dxelé'ene'. Le gusebán benne' gate. Le xebéaj be' xriwe' da zaj xu'u bénneache. Cá'aze guzile xel-la' dxenná bea nigá, na' cá'aze le guchine na, quebe bi sile.

⁹ Quebe gúale dumí oro, ne dumí plata, ne dumí lase. ¹⁰ Quebe gúale xixruj xeta da gágule la neza. Quebe gúale xetú cue' zra lánale, ne zrelale, ne xaga da gúxrule. Benne' wen zrin wazrúequeze' da gawe'.

¹¹ 'Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'. ¹² Gate na' chu'ule lu xu'u na', le xe bénnea' naca lizre' na': "Xela dxebeza zri lazre' suale na le'e." ¹³ Che benne' ca' zaj naca chee' xelezí'e xel-la' ba lá'ana caní, le gucá'ana cá'aze na. Che quebe zaj naca

chee' xezezi'e da nigá, na' quebe gata' chee'. ¹⁴ Che quebe lataj dxelune' le'e, ne quebe dxelenne' cheele, le xedxúaj lu xu'u na' u lu xezre na', na' le xebibe bxrtedu na' zria ní'ale. ¹⁵ Da li dxapa' le'e, ca zrin zra guchi'a Dios, Dios gundxe' da ba xa' chee benne' xezre na' quez ca da guné' chee benne' Sodoma, ne benne' Gomorra, xezre ca' guzría xi'e.

Xelebé nawe' bi ca' chee Jesús

¹⁶ Na' gunná Jesús:

—Le na' xque nigá. Neda' dxesel-la' le'e, gácale ca zrila' zaj zraba' ládujla becu' xi'a ca'. Chee le na', le gaca sina ca zaj naca be'la', san le gaca dxexruj lazre' ca zaj naca bgúgudu ca'. ¹⁷ Le guxúe cuínale. Zaj zra' benne' xuludé' le'e lu na' benne' xu'u lawe', ne xuluzálajé' le'e lu xu'u naga dxulucá'ana szrene' Dios. ¹⁸ Cá'anqueze weleché'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. ¹⁹ Gate na' xuludé' le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle. ²⁰ Quegá le'eze guchálajle, lawe' da Be' Lá'azxa chee Dios guchálajé' lu dxú'ale.

²¹ 'Xuludé bènneache benne' bíchequeze' lu na' benne' xelútié' le'. Cá'anqueze xra xrna xuludé' zrí'ine', na' zrí'ine' ca' xeledábagabe' xra xrnáquezebe' chee xelátie'. ²² Xúgute bènneache xelezré'e le'e lawe' da nácale chia' neda', san bènnea' guxru chache' dizra' chee Dios ca zrin zra

cheajsé cheę', la bėnnea'. ²³ Gate xelebė nawę' le'e tu xęzre, le xuzrunnuj xetú xęzre. Da li neda', Benne' Gulje' Bėnneache, dxapa' le'e, xida' nédxula ca quebe ne tache tale xúgute xęzre cheę benne' Israel.

²⁴ 'Netú benne' quebe naque' szrendxa ca benne' dxusédene' le'. Cá'anqueze netú benne' węn zrin quebe naque' szrendxa ca xrane'. ²⁵ Tu benne' dxusėde dxal-la' gun zi' lazre' gaque' ca naca benne' dxusédene' le', na' benne' węn zrin dxal-la' gun zi' lazre' gaque' ca naca xrane'. Che benne' naque' xrane xu'u dxelė'ę le' Beelzebú, da xriwe', chezradxa xelennė' cheę bi cheę' ca'.

*¿Núzraqueze dxal-la' zrėbedxu?
(Lc. 12.2-9)*

²⁶ Na' gunná Jesús:

—Cheę le' na', quebe zrėbele bėnneache. Xúgute da bagácheze gaca béaqueze na, na' xúgute da dx-elaca ga nagache gulė'e láuqueze na. ²⁷ Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj cheę xelén xúgute benne'. ²⁸ Quebe zrėbele benne' xelútię' bęl-la' dxen cheęle. Quebe xelezėquene' xelútię' bėnne'du xu'ule. Le zrebe Dios. Le' dxezėquene' guzría xi'ę bęl-la' dxen cheęle, ne bėnne'du xu'ule lu lataj ba xa'.

²⁹ 'Dxelúti'ę chupa bxínnedu ca' nen tu dumídau'. Netuba' quebe gáteba' cheę quebe ne güe lataj Xrale. ³⁰ Cá'anqueze xicha xíchajle, xúgute na zaj nababa na. ³¹ Cheę le' na', quebe zrėbele. Zácadxale le'e quėzcala bę zan bxínnedu ca'.

*Dxal-la' xechébedxu nácadxu chee Jesucristo
(Lc. 12.8-9)*

³² Na' gunná Jesús:

—Xúgute benne' ca' dxelexechebe' zaj naque' chia' neda' lau bèneache, cá'aqueze neda' wechébequeza' zaj naque' chia' neda' lau Xra' zue' xabáa. ³³ Benne' ca' quebe dxelexechebe' zaj naque' chia' lau bèneache, néda'queza' québequeze xechéba' zaj naque' chia' lau Xra' zue' xabáa.

*Da naca Jesús naca na tu da dxun na chupa la'a
bèneache
(Lc. 12.51-53; 14.26-27)*

³⁴ Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bèneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. ³⁵ Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zrí'ine'. ³⁶ Ca'an gaca, tu tu benne' tíl-lale xrtía ljwezre' le'.

³⁷ Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'. ³⁸ Che tu benne' quebe gun cuine' ca tu benne' zéajte'e le'e xaga béguaj, ne gune' neda' tuze, quebe naca chee' gaque' chia'. ³⁹ Benne' dxaca lazre' gapa chi'e xel-la' nabán chee' gunitie' na. Bènea' zúatequeze gudé' xel-la' nabán chee' ne chia' neda', guselé' xel-la' nabán chee'.

*Da gunna Dios dxi'u
(Mr. 9.41)*

40 Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bēnea' dxape' neda' ba lá'ana, dxápaqueze' ba lá'ana Dios, Bēnea' gusel-le' neda'.

41 Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bēnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'. 42 Núteteze benne' gunézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazi'e da gunezruj Dios le'.

11

Dxelezn̄in benne' ca' gusel-la Juan lau Jesús (Lc. 7.18-35)

1 Gate bexuzre Jesús bchálajlene' bēneache, na' bchálajlene' chazrinnu benne' ca' dxusédenē'. Bezé'e na' chee cheajsédenē', ne cheajchálaje' lban xúgute xezre ca' lu xezr la xu na'.

2 Juan, bēnea' bchue' bēneache nisa, xu'e lizre xia, na' benne' ca naca da dxun Cristo. Nadxa gusel-le' chupa benne' ca' dxeledálene' le' lau Jesús. 3 Benne' chupe' caní buluchebe' Jesús:

—¿Nacu' Lue' Cristo, Bēnea' dxal-la' xide', u che dxal-la' cuézantu' xelá' xetú benne'?

4 Na' bechebe Jesús:

—Le chjaca cheajézrele Juan da caní dxelé'ele, ne da dxenle. 5 Le xe'e ca dxaca, dxelexelé'e benne' gulaque' la chul-la. Dxelexedá benne' gulezúa zri ní'a ne'e. Belexexaca benne' gulezaque' we'

guzru', ne belexexaca ban benne' ca' gultatíe'. Benne' xache' ca' dxellenne' dizra' chawe' chee Dios. ⁶ Ba neza zrentę naca na chee bėnnea' quebe xucuán lazre' sálenę' neda'.

⁷ Ca besí'aca benne' chupa ca', na' guzú lau Jesús dxuchálajlene' benne' zaj zre'e na' ca naca chee Juan. Dxenné':

—¿Bizra xejjna'le le'e le'e xixre' na'? ¿Xejjna'le tu xia da dxuxrize be'? ⁸ Che cabí, ¿bizra xejjna'le na'? ¿Xejjna'le tu benne' nacue' zra lanę' da zaca? Nézquezle benne' ca' zaj nácuę' ladxe' zaca, lizre benne' dxelenná be'e zaj zra' benne' caní. ⁹ ¿Bízraqueze xejjna'le? ¿Xejjna'le tu benne' dxuchálaje' waláz chee Dios? Awe'. Ca'an guca. Bėnnea' ble'ele na' nácadxe' blau ca tu benne' dxuchálaje' waláz chee Dios. ¹⁰ Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucueze' neza naga teu'. ¹¹ Da li dxapa' le'e, ládujla xúgutę bėnneache quebe nu chilá' benne' nácadxe' blau ca naca Juan, bėnnea' bchue' bėnneache nisa. Naga dxenná bea Dios, bėnnea' nácadxe' benne' dxexruj lazre' nácadxe' blau ca naca Juan na'.

¹² 'Ca lu zra bla' Juan, bėnnea' bchue' bėnneache nisa, bzrintę na'a zra, zaj zra' benne' dxelunę' zi' lazre' xelu'e naga dxenná bea Dios xabáa, na' benne' dxelunę' zi' lazre' dxelezrué'ene' na. ¹³ Ca da bzuaj Moisés lu xiche chee da nadxixruj bea na, ne ca gulenná xúgutę benne' buluchálaje' waláz chee Dios, dxuchalaj na ca naca chee xella' dxenná bea chee Dios, bzrintę ca bla' Juan na'. ¹⁴ Che le'e dxaca lázrele chéajlele da nigá, Juan na' naque' Elías, bėnnea' bchálaje' waláz chee Dios gate

nate, na' dxal-la' xelé'e chee guchálaje' waláz chee Dios. ¹⁵ Che zua nágale, le xen da nigá.

¹⁶ ¿Ájazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxellenēbe' zizraj, dxelé ljwézrebe' ca': ¹⁷ “Bcuézrentu' bchiuj san quebe bxá'ale le'e. Bil-la xáchentú' san quebe gudxézrele.” ¹⁸ Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'e be' xriwe'. ¹⁹ Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bēnea'.

Ca gaca chee bēneache quebe dxuluzúe' xrtizra' Dios

(Lc. 10.13-15)

²⁰ Nadxa guzú lau Jesús dxedil-le' bēneache chee xezre ca' naga bene' xel-la' waca ca' chee xabáa, lawe' da quebe belexebí'i lazre' benne' zaj zre'e na'. Na' gunné':

²¹ —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente ba zeaj gulacue' zra lane' tuzruj, ne gulegú'e de xíchaje' da zaj naca bea na belexebí'i lazre'. ²² Neda' dxapa' le'e, lu zra guchi'a Dios, gundxe' da ba xa' chee quez ca da ba xa' gunē' chee benne' Tiro, ne benne' Sidón. ²³ Le'e zrale xezre Capernaum, ¿dxéquele Dios wechise' le'e xabáa? Dios gudé' le'e lataj ba

xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra. ²⁴ Neda' dxapa' le'e, lu zra guchi'a Dios, gundxe' da ba xa' chee le quez ca gune' da ba xa' chee benne' Sodoma ca'.

*Dxenná Jesús: “Le da naga zua' xezí' lázrele”
(Lc. 10.21-22)*

²⁵ Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxeléajni'ine', san blé'enu' na bidu caní. ²⁶ Ca'an naca, Xrae, lawe' da naca na ca dxaca lazru' Lue'.

²⁷ 'Xra' ba bdee' lu na'a xúgute da caní. Quegá nu benne' núnbe'e neda', Zri'ine Dios, san Xra' Dios núnbe'e neda'. Quegá nu benne' núnbe'e Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'. ²⁸ Le da naga zua', xúgute le'e dxeajxréquele lu zrin dxunle chee xudau', ne ca naca xua da núale, na' neda' guna' xezí' lázrele. ²⁹ Le gunna lataj xrua' le'e ca nu benne' xru'e' bezre xugu' cheeba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezí' lázrele lu bénne'du xu'ule. ³⁰ Da na' naca na ca xugu' chee bezre da xrua' le'e québete ca naca na stebe chee gúale na, na' xua da xrua' le'e naca na zraze.

12

Bi ca' dxusede Jesús dxelequé'e dau zrua' xtila gate naca zra dxulupá'ana judío

(Mr. 2.23-28; Lc. 6.1-5)

¹ Ca lu zra na' xu'u Jesús neza zéaje' ládujla naga de xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawe' dxelálaje' dau naga zria zrua' xtila, ne dxelawe' na. ² Gate belelé'e benne' xudau' fariseo ca' da caní, na' gulé'e Jesús:

—Guná' xque ca dxelún benne' ca' dxusédenu', dxelune' zrin da quebe naca chee' xelune' lu zra dxupá'anadxu.

³ Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledune'? ⁴ Guxú'e lu xu'u chee' Dios, ne gulawe' xeta xtila lá'azxa, da quebe zaj naca chee' xelawe', le', ne benne' ljwezre' ca', san tuze bxruze ca' zaj naca chee' xelawe' na.

⁵ ¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelune' zrin chee' xudau' lu zra dxupá'anadxu, ne quebe zaj nabague' zria? ⁶ Neda' dxapa' le'e, de tu da naca blaudxa ca xudau' nigá. ⁷ ¿Quebe ne chéajni'ile ca zéaje' da naxúaj na lu xiche chee' Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xixre'du ca' lu cugu chia'. La ba guxéajni'ile da nigá, quebe ne guzría xile bénneache quebe zaj nabague' dul-la. ⁸ Chee' le na', neda', Benne' Gulje' Bénneache, napa' xel-la' dxenná bea dxuna' zrin chia' lu zra dxupá'anadxu.

Dxexún Jesús tu benne' zua zri ne'e
(Mr. 3.1-6; Lc. 6.6-11)

⁹ Nadxa Jesús bezé'e na', na' guxú'e tu lu xu'u naga dxelúe lá'ane' Dios. ¹⁰ Zua tu benne' zua zri ne'e ga na'. Benne' judío ca' gulaca lazre' xelezrelne' ájala xelune' chee gaca xelagu zrie' chee Jesús. Chee le na' gulenábene' Le':

—¿Dxunna Dios lataj xexundxu benne' we' lu zra dxupá'anadxu?

¹¹ Jesús guzre' benne' ca':

—Núteteze benne' zue' ládujla le'e, che zua tu zrila' chee', ne che bixreba' tu xedxu situj lu zra dxupá'anadxu, ¿quebe chéaje' cheajxeléaje'-ba' xca'?

¹² Da zrendxa zaca tu benne' quez ca tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

¹³ Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú. ¹⁴ Nadxa beledxúaj benne' xudau' fariseo ca', ne gulezú lawe' dxelílaje' ájala xelune' xelútie' Jesús.

Da gunná tu benne' bchálaje' waláz chee Dios ca dxal-la' gaca chee Jesús

¹⁵ Gate gúquebe'e Jesús da nigá, na' bezé'e na', na' benne' zante zjácále' Le'. Bexún Jesús xúgute benne' we' zaj zre'e ládujla benne' ca'. ¹⁶ Jesús gunné xúene' benne' ca' quebe nu xululé'ene' nu naca Le'. ¹⁷ Caní guca ca da gunná Isaías, benne' bchálaje' waláz chee Dios, gunné':

¹⁸ Benne' nigá naque' wen zrin chia', benne' ba gucá'a.

Benne' nigá nazrí'ida', ne dxezaca ba lázrele'na' Le'.

Guzúaqueza' xichaj lázrdawē' Be' Lá'azxa chia'.
Guzenne' bēnneache xúgute xēzr la xu ca dxuchi'a
da dxaca.

19 Quebe tíl-lalequeze' bēnneache, ne quebe
cuézrexe'e.

Netú benne' quebe xenne' chi'e la neza.

20 Quebe quichje' tu xia da ba nachaj,
ne quebe xusul-le' xi' da ba dxaca wexul-la na,
ca zrindxa zra xuzúe' xel-la' dxenná bea chawe'
chee'.

21 Bēnneache xúgute xēzr la xu xuluxrén lázrequeze'
Le'.

*Dxelenné' napa Jesús xel-la' dxenná bea chee da
xriwe'*

(Mr. 3.19-30; Lc. 11.14-23; 12.10)

22 Nadxa guleché'e lau Jesús tu benne' la chul-la,
benne' quebe dxaca nnie', lawe' da xu'e be' xriwe'.
Jesús bexune' benne' nigá, na' belé'ene', ne bennie'.

23 Xúgute benne' ca' belexebánene', gulenné':

—¿Naca benne' nigá Zri'ine David zra?

24 Gate belén benne' xudau' fariseo da nigá, na'
gulenné':

—Benne' nigá dxebéaje' be' xriwe', dxuchínene'
xel-la' dxenná bea chee Beelzebú, xrane be' xriwe'
ca'.

25 Dxeque be'e Jesús ca da dxelenné', dxelé'e
ljwezre', na' guzre' le':

—Lu xu'u lawe' chee gáteteze xēzre, che
xelaca chupa la'a benne' xu'u lawe' ca', ne bal-
le' xeledíl-lalene' xezícadxe', na' wexul-la wenite
xel-la' dxenná bea chee benne' ca'. Cá'aqueze
che tu xēzre benne', u tu cue' xrtía ljwezre
xelaque' chupa la'a, ne xeledíl-lalene' le sa'

ljwezre', wenítequeze xezre na', u xrtía ljwezre ca'. ²⁶ Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na? ²⁷ Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xelebéaje' be' xriwe' ca'? Chee le na léqueze' dxululé'etene' nanéguele le'e. ²⁸ Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

²⁹ ¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bénnea'? Che guné' caní, na' wazéquene' que'e da de chee bénnea'.

³⁰ 'Nu benne' quebe dxácalene' neda', dxedábague' neda', na' benne' quebe dxexézígalene' neda', dxexúsie' na.

³¹ 'Chee le na' dxapa' le'e, gunite lau Dios chee bénneache xúgute' dul-la zaj nabague', ne xúgute' da caléla da dxelenné', san che xelenné' schanni' chee Be' Lá'azxa, cabata' gunite lau Dios chee'.

³² Núteteze benne', che bi nnie' schanni' chia' neda', Benne' Gulje' Bénneache, Dios gunite lawe' chee', san che tu benne' nnie' schanni' chee Be' Lá'azxa, québequeze gunite lau Dios chee' lu xezr la xu nigá ne cá'anqueze lu xezr la xu da za za'.

Da dxun tu benne' dxule'e na ca naque'
(Lc. 6.43-45)

³³ Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na. ³⁴ Le'e, be snia ca'. ¿Ájazra gunle le'e nnele da xrlátaje che le'e nácaquezle benne' wen da calela xca'? Ca da dxedxuaj dxú'adxu naca na ca da zua na lu xichaj lázrdaudxu. ³⁵ Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. ³⁶ Neda' dxapa' le'e, lu zra guchi'a Dios, xúgute bénneache xuludée' ca da gulenné', tu tu dizra' xala da gulenné'. ³⁷ Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

Bénneache wen da calela ca' dxelenábené' Jesús guné' tu xel-la' waca chee xabáa
(Mr. 8.12; Lc. 11.29-32)

³⁸ Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

³⁹ Na' guzre Jesús benne' ca':

—Bénneache wen da calela, benne' zaj naque' chupa lazre', dxelenábené' neda' guna' tu xel-la' waca da za xabáa. Quebe xeelé'equezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios. ⁴⁰ Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'ukeza' lu xedxu

ba chunna zra chunna xela. ⁴¹ Benne' gulezrē'e xezre Nínive welexásaqueze' lu zra guchi'a Dios gate guchi'e chee bēneache zaj zre'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá. ⁴² Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee bēneache zaj zre'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

*Ca naca chee be' xriwe' da bexú'u na tu benne'
(Lc. 11.24-26)*

⁴³ Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: ⁴⁴ “Webi'a xexá'a lizra' naga bedxúaja'.” Ca xezrín na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na. ⁴⁵ Nadxa cheaj na cheajxezrí na xegazre be' xriwe' da zaj naca na xríwedxa ca le na, na' xúgute na dxelú'u na lu bēnea', na' naca chee benne' na' da caléladxa ca guca chee' nedxu. Cá'anqueze gaca chee bēneache wen da caléla caní.

*Benne' zaj naque' ca xrna Jesús, ne ca benne'
biche' ca'
(Mr. 3.31-35; Lc. 8.19-21)*

46 Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezré'e chalé'ajla, ne dxelaca lazre' xuluchálajlene' Jesús. 47 Nadxa tu benne' guzre' Jesús:

—Xrna'u, ne bi bichu' ca' zaj zre'e chalé'ajla. Dxelaca lazre' xuluchálajlene' Lue'.

48 Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

49 Nadxa ble'e Jesús benne' ca' dxusédené', dxenné':

—Benne' caní zaj naque' xrna'a, ne bi bícha'dau' ca'. 50 Caní naca na lawe' da núteteze benne' dxune' ca' da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

13

Da bsede Jesús ca da ben benne' dxaza

(Mr. 4.1-9; Lc. 8.4-8)

1 Lu zra na' bdxuaj Jesús xu'u, na' xeajdxé'e dxu'a nísadau'. 2 Na' lawe' da belezraga benne' zante naga zua Jesús, guxú'e tu lu da dxedá lawe' nísadau', ne gudxé'e na'. Xúgutę benne' ca' belexegá'ané' dxu'a nísadau' na'. 3 Nadxa bsede Jesús benne' ca' da zante da bchálaje', dxenné':

—Tu benne' dxaza guzé'e zíaje' guza. 4 Dxácate dxaze', bal-la binnedu ca' xeajlechaze na dxu'a neza. Na' belelá' bxinnedu ca', guláguba' binnedu ca'. 5 Bal-la binnedu ca' xeajlechaze na lu xiaj naga quebe dxé'teca xu. Binnedu caní chadí gulezría na lawe' da quebe dxé'teca xu. 6 Gate bla' gubizra, na' gulecuade na. Lawe' da quebe dxé'teca xu, na'

gulebizre na. ⁷ Bal-la binnedu ca' xeajlechaze na naga bezríale'e lba xeche', na' lba xeche' ca' belegula na, ne blule na da du ca' naze'. ⁸ Bal-la binnedu ca' xeajlechaze na lu xu bebe, na' belúnnale'e na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. ⁹ Che zua nágale, le xene.

Dxenná Jesús bizr chee na' dxuchálaje' da dxululé'e na

(Mr. 4.10-12; Lc. 8.9-10)

¹⁰ Nadxa benne' ca' dxusede Jesús gulebigue' naga zué' Le', ne buluchebe' Le':

—¿Bizr chee na' dxuchálajenu' benne' ca' da dxululé'e na?

¹¹ Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj. ¹² Benne' nape' late', Dios gunézrujdxe' le', na' gápale'e, san benne' quebe bi nape', Dios wequ'é'e ca da du nape'. ¹³ Chee le na' dxuchálajena' benne' caní da dxululé'e na, lawe' da cate' dxelenné'e quebe dxelélé'ene'. Cate' dxelenne' quebe dxeléajni'ine'. ¹⁴ Ca naca da dxaca chee benne' caní dxaca na ca gunná Isaías, bénnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

¹⁵ Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácué' xiaj lawe' chee quebe xeelé'ene'.

Quebe dxelenne', na' quebe dxeléajni'ine'.

Quebe dxelexílaję' neda' cheę xexuna' le'.

¹⁶ 'Ba neza zrentę naca na cheęle le'e lawe' da dxelé'ele nen xiaj laule, ne dxenle nen nágale. ¹⁷ Da li dxapa' le'e, benne' zantę, benne' ca' buluchálaję' waláz cheę Dios, ne benne' xrlátaję ca' gulaca lazre' xelexé'ene' da caní dxelé'ele le'e. Quebe belexé'ene' na. Gulaca lazre' xelenne' da caní dxénnele le'e. Quebe belenne' na.

Jesús dxuzéajni'ine' benne' ca' ca naca cheę benne' dxaza

(Mr. 4.13-20; Lc. 8.11-15)

¹⁸ Na' gunná Jesús:

—Le xenne ca zéaję da naca cheę benne' dxaza nigá. ¹⁹ Benne' dxelenne' ca naca cheę Bénnea' dxenná be'e xabáa, ne quebe dxeléajni'ine' zaj naque' ca binnedu ca' xejlechaze na dxu'a neza. Za da xriwe' ne dxugúa na ca naca dizra' da ba gulezi'e lu xichaj lázrdawe'. ²⁰ Ca naca cheę binnedu ca' xejlechaze na lu xiaj, da caní dxululé'e na ca naca cheę benne' ca' dxelezi'e dizra' na' du lazre'. ²¹ Ca na' guca cheę binnedu ca', quebe guca xuludé lue na, ne quebe guzí bea na, ca'an dxaca cheę benne' caní, gate na' bi da dxelezaque', u che nu zeajnáu zi' xuzre' le' lawe' da zaj nazi'e dizra' nigá, na' dxelexebigue'. ²² Binnedu ca' xejlechaze na ládujla xeche' dxululé'e na ca naca cheę benne' dxelenne' dizra' nigá, san dxelebé'le'e gunne xue da naca cheę xęzr la xu nigá, na' ca naca xel-la' gunní'a dxezí xę na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. ²³ Ca naca cheę binnedu ca' da xejlechaze na lu xu

bebe, da caní dxululé'e na ca naca chee benne' ca' dxellenne' dizra' nigá, ne dxeléajni'ine' na, na' zaj naque' ca bínnedu ca' belúnnale'e na. Bal-la benne' zaj naque' ca bínnedu ca' belunna na tu gaxúa tu tu na, na' xebal-le' zaj naque' ca bínnedu ca' belunna na ga xun tu tu na, na' xebal-le' zaj naque' ca bínnedu ca' belunna na chi dxua tu tu na.

Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila

²⁴ Nadxa bchalaj Jesús xetú da dxululé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'. ²⁵ Gate dxelase xúgute', na' bzrin tu benne' dxezré'e le', ne xeajaze' binne xixre' zrinnaj láwela zrua' xtila, na' bezé'e. ²⁶ Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. ²⁷ Nadxa benne' wen zrin ca' xeajleguezre' xrane na, dx-elé'e le': “Xran, guzu' binne cháwe'dau' lu xezr la xu chiu'. ¿Gazra guzá xixre' zrinnaj caní?” ²⁸ Gunná xránabe': “Tu benne' dxezré'e neda' bene' da nigá.” Nadxa benne' wen zrin ca' buluchebe' le': “¿Dxaca lazru' chéajntu' cheajlépentu' xixre' zrinnaj ca'?” ²⁹ Le' guzre' wen zrin ca': “Quebe gaca na. Gate na' lázrule xixre' zrinnaj ca', walázzrutele xel-la' zrua' xtila. ³⁰ Xelegúladxá na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelequé'e nedxu xixre' zrinnaj ca', na' xuluchéaje' xelune' tu xrúnujdu weaj chee guzézxedxu na. Nadxa xeelape' zrua' xtila na, ne xezrá chawe' na lizra'.”

*Da bchalaj Jesús ca naca chee binne mostaza
(Mr. 4.30-32; Lc. 13.18-19)*

³¹ Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'. ³² Da li binne mostaza nigá naca na da bízrujdxá lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxelezeque' cheajlezría bxínnedu ca' xrú'neba' lu zruze na.

*Da bchalaj Jesús ca naca chee cua zichaj chee xeta xtila
(Lc. 13.20-21)*

³³ Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu nu'úla bchixre cua zichaj chee xeta xtila lawe' chunna xaga cua zrua' xtila, na' dutę na guxasa na bliche.

*Ca bchine Jesús da dxulé'e na caní
(Mr. 4.33-34)*

³⁴ Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na.

³⁵ Caní guca ca da gunná benne' bchálaje' waláz chee Dios, gunné':

Guchálaja' ca naca da dxulé'e na da guchálaja'.

Gulé'eda' ca naca da nagache gate guzrete xezr la xu.

Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila

³⁶ Nadxa Jesús bze' benne' ca' dizra', na' guxú'e lu xu'u. Benne' ca' dxusede Jesús gulebigue' lau Le', na' gulé'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

³⁷ Nadxa Jesús guzre' benne' ca':

—Bénea' dxaze' binne cháwe'dau' nigá naque' Benne' Gulje' Bénneache. ³⁸ Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. ³⁹ Bénea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios. ⁴⁰ Ca belexequé'e xixre' zrinnaj ca', ne buluzré'e na lu xi' chee xelezxe na, ca'an gácaqueze lu zra bzebe na'. ⁴¹ Neda', Benne' Gulje' Bénneache, sel-la' gubáz chee xabáa chia' ca' chee xulucuase' naga nna be'a xúgute benne' ca' dxuluxrinnajte' benne' xula, ne benne' ca' dxelune' da calela. ⁴² Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xelebezre', ne xeláguxa'ate lazxe'. ⁴³ Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

Da dxulé'e na ca naca cheę tu xel-la' gunní'a da nagache

⁴⁴ Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xęzr la xu. Tu benne' bezrélene' xel-la' gunní'a nigá, na' bucachę' na. Ne zúalę'e xel-la' dxebé zexíaje' xeajxétie' xúgute da nape', na' bezi'e xęzr la xu na'.

Da dxulé'e na ca naca tu bga da zácale'e na

⁴⁵ Na' gunná Jesús:

—Naga dxenná bea Dios naca na ca tu da dxex-ilaj tu benne' węte, dxexílaje' bga ca' da zaj zaca na. ⁴⁶ Gate dxezrélene' tu da zácale'e, na' zexíaje' zeajxétie' xúgute da nape', na' si'e bga na'.

Da dxulé'e na ca naca tu xixruj bela

⁴⁷ Na' gunná Jesús:

—Ca naca cheę benne' ca' xelexú'e naga dxenná bea Dios, naca na ca tu xixruj bela, da dxuluzalę' lu nísadau', na' dxelezenę' zane' cue' bela. ⁴⁸ Gate dxezrá xixruj na', na' benne' ca' dxelezenę' bela dxelexequę'e na dxu'a nísadau', na' dxelebé'e dx-elexebé'e' bela ca'. Bela chawe' ca' dxuluzré'e-ba' lu xcuite, na' bela xala ca' dxeledxú'une'-ba'. ⁴⁹ Ca'an gaca lu zra bęębe na'. Xeledxúaj gubáz cheę xabáa ca', xelexebéaje' benne' ca' dxelunę' da caleļa ládujla benne' xrlátaje ca'. ⁵⁰ Xuluzré'e benne' ca' dxelunę' da caleļa lu xi' gabila, naga xebezre', ne xeláguxa'atę lazxe'.

Da zaca ca da zaj naca na da cube, ne da zaj naca na da gula

⁵¹ Nadxa bcheębe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

⁵² Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

Jesús dxexezrine' Nazaret

(Mr. 6.1-6; Lc. 4.16-30)

⁵³ Gate bexuzre bchalaj Jesús da dxulé'e na caní, na' bezé'e na'. ⁵⁴ Bezrine' naga naca lazrie'. Na' guzú lawe' dxusédene' benne' ca' zaj zre'e lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní? ⁵⁵ Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas. ⁵⁶ Bi zane' zaj zue' nigá nen dxi'u. ¿Ájazra na' dxaca dxune' da caní?

⁵⁷ Chee le na' buluzúe' Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Dios. Benne' lazrie', ne xrtia ljwezre' quebe dxelúne' ca'.

⁵⁸ Jesús quebe bénteque' na' xel-la' waca ca' lawe' da quebe guléajle'e chee'.

14

Ca gute Juan, bēnnea' bchue' bēnneache nisa
(Mr. 6.14-29; Lc. 9.7-9)

¹ Lu zra na' Herodes, benne' dxenná be'e xezre ca' zaj nababa na Galilea, benne' ca naca da dxun Jesús. ² Na' guzre' bi wēn zrin chee' ca':

—Benne' nigá naque' Juan, bēnnea' bchue' bēnneache nisa. Ba bebane' ládujla benne' gate. Chee le na' nape' xel-la' waca zren nigá.

³ Caní gunné' lawe' da gudēla Herodes nigá Juan na', ne bchéaje' le' du xia, ne gulu'e le' lizre xia. Beñe' caní ne chee Herodías, zru'ula Felipe, biche Herodes na'. ⁴ Caní beñe' lawe' da guzre Juan le':

—Quebe naca chiu' súałenu' nu'ula nigá.

⁵ Herodes guca lazre' gutie' le', san dxezrebe' da xelún bēnneache ca' lawe' da dxeléquene' naca Juan benne' dxuchálaje' waláz chee Dios. ⁶ Gate bzin zra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'. ⁷ Chee le na' Herodes guchebe lazre' lau benne' ca' gunézruje' ca da naba bi nú'uladu na'. ⁸ Lawe' da ba guzre xrnabe' lebe', na' gunabe':

—Benna nigá xichaj Juan, bēnnea' bchue' bēnneache nisa. Gulú'u na tu lu xé'ena.

⁹ Nadxa guzúa stēbe Herodes, bēnnea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le na' guzre' tu benne' wēn zrin chee' gunézruje' na lebe'.

¹⁰ Gunná bé'ene' nu benne' guchugue' xichaj Juan naga xu'e lizre xia. ¹¹ Nadxa xejlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézruje' na xrnabe'.

¹² Nadxa belezrín benne' ca' bseḁe Juan, na' belexú'e le', ne xeajlecache' le'. Nadxa xjaque' xeajlegueze' Jesús.

*Dxugagu Jesús chi xun gaxúa benne' biu
(Mr. 6.30-44; Lc. 9.10-17; Jn. 6.1-14)*

¹³ Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga quebe nu zra' benne'. Gate belén bēneache, na' gusiá'que' ni'e, na' belezrine' naga zua Jesús.

¹⁴ Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le', na' bexune' benne' ca' quebe chawe' zaj zue'. ¹⁵ Gate ba za xrinne, benne' ca' dxuseḁe Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xelezí'e da xelawe'.

¹⁶ Jesús guzre' le':

—Quebe dxun na ba xen chjaque'. Le gunezruj le'e da xelawe'.

¹⁷ Benne' ca' gulé'e Le':

—Gáxzuze xeta xtila de cheedxu nigá, ne chúpaze bela.

¹⁸ Jesús guzre' benne' ca':

—Le gunna na nigá.

¹⁹ Nadxa gunná bé'ene' gulebé' benne' zan ca' lawe' zrie. Guqué'e xeta xtila, ne bela ca', na' gunné'e xabaala, ne guzre' Dios: “Xcalenu.” Nadxa bzúzruje' xeta xtila, ne bnézruje' na benne' ca' dxusédené', na' benne' ca' gulísie' na lávela benne' zan ca'. ²⁰ Xúgute' gulawe', ne gulélajene'. Ca gude na' bulusuzré'e chazrinnu ga' da bízrujdu ca'

zaj nagá'ana. ²¹ Benne' gulawé' na zaj naque' chi xun gaxúa benne' biu, ne quebe nu blaba nu'ula, ne bidu ca'.

Jesús dxedé' lawe' nisa

(Mr. 6.45-52; Jn. 6.16-21)

²² Nadxa gunná be'e Jesús benne' ca' dxusédene' xelu'e lu da dxedá lawe' nísadau' chee xelague' nísadau' nédxudxa ca Le' chee xelexezrine' xéchala'a nísadau' na', dxácatē Le' dxuzé benne' zan ca' dizra'. ²³ Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zue' tuze'. Gate guxrinne zua Jesús tuze' na'. ²⁴ Dxácatē na' ba zeaj da na' dxedá lawe' nísadau' gachaj láwe'tē nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácalē'e be', ne quebe dxue na lataj sa na. ²⁵ Gate gudé dxēla gubiga Jesús naga zaj zre'e, zéaje' lawe' nisa. ²⁶ Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxēla na'.

²⁷ Jesús guzre' benne' ca':

—Le gun dipa lázrele. Neda' nigá. Quebe zrébele.

²⁸ Na' gunná Pedro, dxē'e Jesús:

—Xran, che Lue' na', gunná be'e xida' lawe' nisa naga zu' na'te.

²⁹ Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa chee zrine' naga zua Jesús. ³⁰ Gate dxēque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, beca'a neda'.

³¹ Nadxa beca'a Jesús ne'e, ne guzre' le':

—Látega dxeajlí lazru' neda'. ¿Bizr chee na' ben chupa lazru'?

³² Gate belexegüene' lu da dxedá lawe' nísadau', na' bebé' zri be' na'. ³³ Nadxa benne' ca' zaj zre'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

Jesús dxexune' benne' we' ca', benne' zaj zre'e lu xezre Genesaret

(Mr. 6.53-56)

³⁴ Guledé'e xecha la'a nísadau', na' belezrine' lu xezr la xu chee benne' Genesaret ca'. ³⁵ Gate benne' ca' zaj zre'e xezre na' belexexúnbe'e Jesús, na' buludé'e dizra' xezícala xézredu ca', na' guleché'e xúgute benne' we' naga zua Jesús. ³⁶ Gulata' xuene' Jesús gu'e lataj xulutá benne' ca' zra lane' naze. Xúgute benne' buluté' zra lane' belexexaque'.

15

Da dxuxrinnaj na bèneache

(Mr. 7.1-23)

¹ Nadxa benne' fariseo ca', ne benne' dxulux-uzájle'e da bdxixruj be'e Moisés, benne' ca' beledx-uaje' lu xezre Jerusalén, gulebigue' lau Jesús, na' buluchebe' Le', dxelenné':

² —¿Bizr chee na' benne' ca' dxusédenu' quebe dxuluzúe' dizra' ca naca da gulún xra xrtaudxu? Quebe dxelíbequeze ne'e ca naca da zéajlentu' gate dxelawe'.

³ Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele.

⁴ Dios gunné': "Gudapa ba lá'ana xra xrna'u."

Cá'anqueze gunné': "Benne' nne' schanni' chee xra xrne'e, le gute bénnea'." ⁵ Le'e dxennale waca xe tu

benne' xra xrne'e: "Quebe séqueda' bi gunna' le'e lawe' da ba guchebe lazra' gunézruja' Dios xúgute

da de chia'." ⁶ Dxennale che tu benne' dxune' caní québedxa dxun na ba xen gácalene' xra xrne'e. Caní

dxunle le'e, dxuzuale chala'ala da bdxixruj be'e Dios, chee gunle ca naca da zéajlele. ⁷ Le'e, láweze

dxunle da xrlátaje. Da li naca da gunná Isaías, bénnea' bchálaje' waláz chee Dios, ca naca cheele

le'e, gunné':

⁸ Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana duté lázrdawe'.

⁹ Dácheze naca dxelúe lá'ane' neda'.

Da gulenná be'ene' bénneache naca na da ca' dxulusédene'.

¹⁰ Nadxa Jesús gunné' benne' ca', dxenné':

—Le xene, ne le chéajni'i. ¹¹ Da dxu'u na dxu'a bénneache quegá le na guxrinnaj na bénneache. Da

dxedxuaj na dxu'a bénneache naca na da dxuxrinnaj na bénneache.

¹² Nadxa benne' ca' dxusede Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnú'?

¹³ Jesús guzre' benne' ca':

—Bíteteze xágadau' da quebe guza Xra' zue' xabáa, welépeda'. ¹⁴ Le gusán benne' ca'. La chulla zaj naque', ne dxulusi'e neza le sa' ljwezre' la

chul-la ca'. Che tu la chul-la che'e le sa' ljwezre' la chul-la, dxúpatē' xelexre' tu lu xēdxu.

¹⁵ Nadxa Pedro guzre' Jesús:

—Bzéajni'i netu' ca naca chee da dxulé'e nigá.

¹⁶ Gunná Jesús:

—¿Cá'anqueze le'e quebe dxéajni'ile? ¹⁷ ¿Quebe nézele xúgute da dxu'u na dxú'adxu zeaj na le'ēdxu, na' te na' xedxuaj na? ¹⁸ Da dxedxuaj na dxú'adxu naca na da za' lu xichaj lárdaudxu. Da nigá naca na da dxuxrinnaj na bēneache. ¹⁹ Lu xichaj lárdaud bēneache dxeledxuaj da dxezá lazre' da calela, ca naca xel-la' wete benne', ne ca naca xel-la' zuale zru'ula benne' xula, ne ca naca da sban da dxelún bēneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj. ²⁰ Da caní dxuluxrinnaj na bēneache. Che tu benne' quebe dxexibe ne'e ca da zéajle gate dxawe' xeta, da nigá quebe dxuxrinnaj na le'.

Tu nu'ula zitu' dxéajle'e chee Jesús

(Mr. 7.24-30)

²¹ Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón. ²² Tu nu'ula Canaán zue' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáittega dxézácabe'.

²³ Quebe bi bechebe Jesús. Nadxa belezrín benne' ca' dxusédenē', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

²⁴ Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca' zríla'du ca' zaj naníteba'.

²⁵ Gubiga nu'ula na' naga zua Jesús, ne bzu zribe' lau Le', ne dxe'e Le':

—Xran, gúcale neda'.

²⁶ Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

²⁷ Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

²⁸ Nadxa Jesús guzre' le':

—Nú'uladu, da zrente naca xel-la' dxeajlí lazre' chiu'. Gaca ca dxaca lazru'.

Lu zra ná'queze bexaca zrí'ine' nú'uladu na'.

Jesús dxexune' benne' zante benne' we'

²⁹ Jesús guzé'e na', gudé'e dxu'a nísadau' chee Galilea. Guluéne' tu lu xi'a, ne gudxé'e na'.

³⁰ Benne' zan belezrine' naga zua Jesús, zaj naché'e benne' zrinna' ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' we'. Buluzré'e benne' ca' lau Jesús, na' Le' bexune' le'. ³¹ Ca'an guca belexebane benne' ca' gate belelé'ene' dx-elenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinna', ne dxelelé'e benne' ca' gulaque' benne' la chul-la. Gulezú lawe' dxelúe lá'ane' Dios chee benne' Israel ca'.

*Jesús dxugawe' tapa cue' tu gaxúa benne' biu
(Mr. 8.1-10)*

³² Nadxa Jesús gunné' benne' ca' dxusédenē'. Dxe'e le':

—Dxexache lazra' chee benne' caní lawe' da ba zeaj chunna zra zralēnē' neda' nigá, ne quebe bi de da xelawē'. Quebe dxaca lazra' xesel-la' le' chee cheajxaque' lizre' quebe ne xelawē' chee quebe xelate ni'a ne'e la neza.

³³ Nadxa benne' ca' dxusēde Jesús gulé'e Le':

—¿Ájazra guntu' zréntu' da xelagu cátitē benne' zan caní? Lataj nigá quebe nu chilá' benne' zua lizre' nigá.

³⁴ Jesús bchebe' benne' ca', dxenné':

—¿Bal-la xeta xtila nápa'e?

Benne' ca' belexechebe':

—Gazre na, ne xetú chupa béladau'.

³⁵ Nadxa Jesús gunná bé'ene' benne' zan ca' xelebé'e lu xu. ³⁶ Guqué'e da gazre xeta xtila, ne béladu ca', na' guzre' Dios: “Xcalenu'.” Nadxa bzúzruje' na, ne bnézruje' na benne' ca' dxusédenē', na' benne' ca' gulísiē' na chee benne' zan ca'.

³⁷ Xúgute' gulawē', ne belélajtēnē'. Gudé na' bulusuzrate' gazre ga' da bízrujdu ca' zaj nagá'ana.

³⁸ Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. ³⁹ Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexíaje' naga nababa xezre Magdala.

16

*Dxelenabe' Jesús gunē' tu xel-la' waca chee xabáa
(Mr. 8.11-13; Lc. 12.54-56)*

¹ Benne' xudau' fariseo ca', ne benne' xudau' saduceo ca' xjaque' naga zua Jesús chee xulux-unéguene' Le'. Chee le na' gulenabe' Jesús guné' tu xel-la' waca zrenté da za xabáa. ² Jesús bechebe' benne' ca':

—Xelate' zua gubizra dxennale le'e: “Gun chawe' wxre lawe' da da' beuj xrna zran xabáa.” ³ Che zílala dxennale: “Quebe chawe' gun na'a zra lawe' da dá'le'e beuj xrna zran xabáa.” Le'e dxulé'e cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra. ⁴ Benne' wen da caléla caní, benne' zaj nabéaj xíchajé' Dios, dxelenabe' guna' tu xel-la' waca zrenté. Quebe xeelé'ene' xetú xel-la' waca. Welelé'ene' tuze da gaca na ca da guca chee Jonás.

Nadxa bulucá'ana Jesús benne' ca', zjá'aque'.

Da dxelún benne' xudau' ca' da naca na ca cua zichaj chee xeta xtila

(Mr. 8.14-21)

⁵ Gate benne' ca' dxusede Jesús guladé' xechalá'a nísadau', na' gulal-la lazre' xelu'e chizre'.

⁶ Jesús guzre' le':

—Le nna'xque. Le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'.

⁷ Benne' ca' dxusede Jesús gulezú lawe' dxelé ljwezre':

—Caní dxenné' lawe' da quebe núadxu xeta xtila.

⁸ Jesús dxeque be'ene', na' guzre' le':

—¿Bizr chee na' dxennale naca na lawe' da quebe núale xeta xtila? Láteze dxéajlele chia'.

⁹ ¿Quebe ne chéajni'ile, ne quebe dxeajsá lázrele

chee da gazxu' xeta xtila da bgawa' gazxu' cue' chi gaxúa benne' biu, ne bal-la ga' beca'ale? ¹⁰ ¿Quebe dxeajsá lázrele chee da gazre xeta xtila da bgawa' tapa cue' chi gaxúa benne' biu ca', ne bal-la ga' beca'ale? ¹¹ ¿Ájazra na' quebe dxeque be'ele quegá bchálaja' chee xeta xtila gate gunnía' le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'?

¹² Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxulusede benne' fariseo ca', ne benne' saduceo ca'.

Pedro dxenné' Jesús naque' Cristo

(Mr. 8.27-30; Lc. 9.18-21)

¹³ Gate bzrin Jesús naga nababa xezre Cesarea da ben Filipino, na' bchebe' benne' ca' dxusédene':

—¿Nuzra na' dxeleenná bèneache naca' neda', Benne' Gulje' Bèneache?

¹⁴ Na' benne' ca' gulenné':

—Bal-la benne' dxeleenné' nacu' Juan, bènea' bchue' bèneache nisa. Xebal-le' dxeleenné' nacu' Elías, na' xebal-le' dxeleennáqueze' nacu' Jeremías, u xetú benne' bchálaje' waláz chee Dios.

¹⁵ Nadxa guzre Jesús benne' ca':

—¿Gazra le'e? ¿Nuzra na' dxennale naca'?

¹⁶ Gunná Simón Pedro:

—Lue' nacu' Cristo, Zri'ine Dios ban.

¹⁷ Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'. ¹⁸ Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na'

xel-la' dxenná bea chee da xriwe' quebe seque na gucu'uj na benne' ca'. ¹⁹ Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

²⁰ Nadxa Jesús gunná bé'ene' benne' ca' dxusédene' chee quebe nu xelé'e naca Le' Cristo.

Jesús dxuchálaje' ca gaca gate gatie'

(Mr. 8.31—9.1; Lc. 9.22-27)

²¹ Lu zra ná'queze guzú lau Jesús dxuzéajni'ine' benne' ca' dxusédene' dxal-la' xexíaje' xezre Jerusalén, na' benne' gula ca', ne benne' xíchaje ca' chee bxruze ca', ne benne' dxuluxuzájle'e da nadxixruj bea Dios wulusaca zi'e Le'. Na' guzre' benne' ca' dxusédene' welute benne' Jerusalén ca' Le'. Nadxa gate gaca chunna zra xebane'.

²² Nadxa Pedro guléaje' Jesús chalá'ala, ne guzú lawe' dxedil-le' Le', dxenné':

—Dios quebe gu'e lataj, Xran. Cabata' gaca chiu' da caní.

²³ Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bèneache dxulaba lazru'.

²⁴ Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee gatie', na' nadxa gaca xídalene' neda'.

²⁵ Bénnea' dxaca lazre' gapa chi'e xel-la' nabán chee' gunitie' na. Bénnea' gunitie' xel-la' nabán chee' lawe' da dxune' zrin chia', benne' nigá

zrué'ene' xel-la' nabán du lazre'. ²⁶ ¿Bízraqueze ba neza naca na chee tu benne' che gata' chee' xúgute xel-la' gunní'a da de lu xezr la xu nigá, na' cuía xi'e lau Dios? Quebe bi gaca quizruj tu benne' chee la bénne'du xu'e lau Dios. ²⁷ Neda', Benne' Gulje' Bénneache wida' xecha lasa nen xel-la' szren chee Xra', ne nen gubáz chee xabáa ca'. Nadxa xuzría chee tu tu benne' ca naca da zaj nun tu tue'. ²⁸ Da li dxapa' le'e, bal-la benne' zaj zre'e nigá quebe xelatíe' cadxa xeelé'ene' neda', Benne' Gulje' Bénneache, xida' xedajnná be'a.

17

Dios dxuché'e ca dxenná' lau Jesús

(Mr. 9.2-13; Lc. 9.28-36)

¹ Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjácalene' Le' tu lau xi'a sibe. ² Na' Dios bche'e ca dxenná' lau Jesús lávela benne' ca'. Lawe' guca tite na ca gubizra, na' zra lané' guca na da chiche ca xel-la' naxaní'. ³ Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús. ⁴ Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee Moisés, ne tu chee Elías.

⁵ Dxácaté dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':

—Benne' nigá naque' Zri'ina' nazrí'ite lazra', ne chee Le' dxezaca ba lazra'. Chee Le' le xene.

⁶ Gate belenne' da nigá, na' gulate' sudxú'ala lu xu. Dxelegrébele'e. ⁷ Nadxa Jesús gubigué' naga zaj zré'e, na' bte' benne' ca', ne guzré' le':

—Le chasa. Quebe zrébele.

⁸ Gate na' belenné'e, québedxa nu belelé'ene'. Tuze Jesús zue'.

⁹ Nadxa gate dxelexexétaje' lu xi'a na', Jesús gunná bé'ene' benne' ca', dxenné':

—Quebe nu guchálajle ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

¹⁰ Nadxa benne' ca' dxusede Jesús buluchebe' Le':

—¿Bizr chee na' dxeleenná benne' ca' dxulux-uzájle'e da nadxixruj bea Dios dxun na ba xen xelá' Elías nédxudxa ca xelá' Cristo?

¹¹ Jesús guzré' benne' ca':

—Da li xelá' Elías nédxudxa, ne gucá'ana chawé' ca naca da dxal-la' gaca. ¹² Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

¹³ Nadxa benne' ca' dxusede Jesús guléque be'ene' dxuchalaj Jesús ca naca chee Juan, bénnea' bchué' bénneache nisa.

Jesús dxexuné' tu bi biu dxe'ebe' chuna'

(Mr. 9.14-29; Lc. 9.37-43)

¹⁴ Gate belezriné' naga zaj zra' benne' zante, na' tu benne' gubigué' naga zua Jesús, ne bzu zribe' lau Le', dxenné':

¹⁵ —Xran, bexache lazre' zri'ina', dxe'ebe' chuna', ne da zrenté da dxezácabe'. Záneté lasa

ba xeajcházebe' lu xi', ne lu nisa. ¹⁶ Ba bedajgu'a-be' lau benne' caní dxusédenu', na' quebe guca xelexune'-be'.

¹⁷ Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalena' le'e? ¿Bátate naca' zren lazre' nen le'e? Le cheajxri' bi cuide' na' nigá.

¹⁸ Nadxa Jesús gudil-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexácatebe'.

¹⁹ Gudé na' benne' ca' dxusede Jesús gulenné' Le' chalá'ala, na' buluchebe' Le':

—¿Bizr chee na' quebe guca netu' xebéajntu' be' xriwe' na'?

²⁰ Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápale xel-la' dxeajlí lazre', lácala naca na láteze ca naca tu binnedau' chee mostaza, waca xeje xi'a nigá: “Gucuasa nigá chéaju' xetú lataj”, na' xi'a na' wacuasa na. Quebe bi de da quebe gaca gunle che nápale xel-la' dxeajlí lazre'. ²¹ Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

Jesús dxuchálaje' xecha lasa ca gaca gate gatie'
(Mr. 9.30-32; Lc. 9.43-45)

²² Dxácate na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache. ²³ Xelútie' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

Da dxuluchízruje' bénneache chee xudau'

²⁴ Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

²⁵ Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláxr chee', u benne' zitu' ca'?

²⁶ Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláxr chee' quebe xelízruje'.

²⁷ Na'a, chee quebe nu guchá'adxu, guxíaj lu nísadau' na', ne guchize da na' dxeláleu' bela lu nisa na', na' bebéaj bela nedxu quelu'-ba'. Dxú'aba' na' xezrelnu' tu dumí da quízruju' chiu' lue', ne chia neda'. Bia na, ne xeajtizruj na lau benne' ca'.

18

Nu benne' nácadxa blau xabáa
(Mr. 9.33-37; Lc. 9.46-48)

¹ Tu lasa gulebiga benne' ca' dxusede Jesús naga zue', na' buluchebe' Le':

—¿Nuzra benne' nácadxe' blau naga dxenná bea Dios?

² Nadxa Jesús gunné' tu bidau', na' bze'-be' lau benne' ca' dxusédene'. ³ Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. ⁴ Ca'an naca, benne' nácadxe' blau naga dxenná bea Dios xabáa, naca benne' gague' dxexruj lazre', ne xexaque' ca bidu nigá. ⁵ Benne' gape' ba lá'ana tu bidau' caní lu La' neda', néda'queza' gape' ba lá'ana.

Ca naca da dxun na gundxu dul-la

(Mr. 9.42-48; Lc. 17.1-2)

⁶ Na' gunná Jesús:

—Núteteze benne' guné' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'. ⁷ Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxeluné' xelún bénneache dul-la. ⁸ Chee le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u. ⁹ Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpaté xiaj lau'.

Da dxulé'e na ca naca chee zriila' naníteba'

(Lc. 15.3-7)

¹⁰ Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz chee xabáa chee bidu

caní lau Xra' xabáa. ¹¹ Neda', Benne' Gulje' Bénneache, bla'a bedajselá' benne' zaj nanitie'.

¹² '¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' be tápalalaj chenu na' le'e xixre', na' cheajdilje' zrila' na' naníteba'? ¹³ Gate ba bezrelne'-ba', wabéle'edxene' chee be tu na' quézcala chee be tápalalaj chenu ca' quebe guleníteba'. ¹⁴ Cá'anqueze Xrale le'e, zue' xabáa, quebe dxaca lazre' nite netú bidu caní.

*Ca dxal-la' gunite laudxu chee le sa' ljwézredxu
(Lc. 17.3)*

¹⁵ Na' gunná Jesús:

—Che bi bichu' dxunbe' chiu' da calēla, bchálajle tuze lebe', chee xúnbeabe' da calēla da benbe'. Che xenbe' da dxu'u-be', na' ba bexacu' tuze bi bichu'. ¹⁶ Che quebe xenbe' da dxu'u-be', guché' tu chupa benne' chee gaca chupa u chunna benne' xelexechebe' ca naca da dxu'u-be'. ¹⁷ Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle'e chee Dios, u ca tu benne' dxuchízruje' waláz chee benne' zitu' ca'.

¹⁸ 'Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

¹⁹ 'Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunne' na. ²⁰ Naga zaj zra' chúpabe', u chúnname' zaj

nazrágabe' lu La' neda', na' zúaqueza' neda' laduj lebe'.

²¹ Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheebe'? ¿Gazre lasa?

²² Bechebe Jesús:

—Dxapa' lue', quegá gazre lasa, san ga xun chi da gazre lasa.

Benne' wen zrin quebe guca lazre' gunite lawe' chee le sa' ljwezre'

²³ Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'. ²⁴ Gate guzú lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí. ²⁵ Lawe' da quebe de chee' benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee' gazruj da na' dxebague'. ²⁶ Nadxa bzu zribe benne' wen zrin na' lau xrané', na' guta' xuene' le', dxenné': “Xran, ben zren lazre' neda', na' quízrujqueza' ca naca na.”

²⁷ Na' xrané' bexache lazre' le', ne bnite lawe' da na' dxebague' chee', ne bsané' le'. ²⁸ Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látedau'. Na' gudēle' lba bēnea', ne guzú lawe' dxusézxuje' chí'i bēnea', dxē'e le': “Gudizruj neda' da dxal-lu' chia'.” ²⁹ Nadxa benne' wen zrin ljwezre' na' bzu zribe' lau le', ne guta' xuene' le', dxenné': “Ben

zren lazre' neda', na' quízrujqueza' ca naca na.”
³⁰ Bénnea' quebe guca lazre', na' guxíaje' xeajlu'e
 wen zrin ljwezre' na' lizre xia dxácatē quízruje'
 da na' dxebague'. ³¹ Gate benne' wen zrin ca'
 xezícala guleque bé'ene' da nigá, na' belewí'ine
 lázrele'ene', na' xjaque' xeajleguezre' xrane' xúgute'
 da ba guca. ³² Nadxa xrane' na' gunná bé'ene'
 xeajlenné' benne' wen zrin na', na' guzre' le':
 “Bi wen zrin calela. Neda' bnite lawa' chiu' ca
 naca da na' dxebagu' chia' lawe' da guta' xúenu'
 neda'. ³³ Cá'anqueze lue' dxal-la' xexache lazru' le
 sa' ljwezru' na' ca bēna' neda' bexache lazra' lue'.”
³⁴ Xrane' na' bzrá'alē'e bénnea', na' bdee' le' xel-la'
 zi' dxácatē na' quízruje' ca naca da na' dxal-le' chee'.

³⁵ Nadxa gunná Jesús:

—Cá'anqueze gun Xra' zua xabáa chee le'e
 che quebe gunitē laule dutē lázrdaule chee le sa'
 ljwézrele.

19

*Da bchalaj Jesús ca naca chee benne' dxulusán
 ljwezre'*

(Mr. 10.1-12; Lc. 16.18)

¹ Ca gudé bchalaj Jesús da caní, na' bezé'e xezre
 ca' zaj nababa Galilea, na' bezrine' chalá'ala naga
 nababa Judea, da zua chalá'ala xegu Jordán naga
 dxalaj gubizra. ² Benne' zan zjácalēne' Le', na'
 bexune' benne' zante, benne' we'.

³ Nadxa bal-la benne' xudau' fariseo gulebigue'
 naga zua Jesús chee xelebéaje' Le' dizra' chee gaca
 xelagu zrie' Jesús, na' buluchēbe' Le':

—¿Waca nu benne' gusanē' zru'ule' ne chee bíteteze da gune'?

⁴ Bechebe Jesús:

—¿Quebe ne gulábale le'e lu xiche lá'azxa da na' dxenná na: “Bennea' bene' benne' ca' nédxudautē bene' le' benne' biu, ne nu'ula”? ⁵ Cá'anqueze gunné': “Chee le' na' benne' biu gusanē' xra xrne'e chee gaque' tuze nen zru'ule', na' dxupe' xelaque' ca tuze benne'.” ⁶ Caní naca na, québedxa zaj naque' chupe', san tuze benne' zaj naque'. Chee le' na' quebe dxal-la' xelá'a bēnneache da na' ba nuchaga Dios.

⁷ Nadxa buluchēbe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belex-elé'e, na' gusanē' le'?

⁸ Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zrú'ulale, san nédxudautē quebe guca na ca'. ⁹ Neda' dxapa' le'e, che tu benne' gusanē' zru'ule', ne quebe dxedálene' benne' biu xula, na' che xezúalene' nu'ula xula, benne' nigá gune' dul-la súalene' nu'ula quebe naque' zru'ule', na' che nu benne' biu xequé'e tu nu'ula nusán benne' chee', cá'anqueze gun dul-la bēnnea' súalene' nu'ula quebe naque' zru'ule'.

¹⁰ Nadxa benne' ca' dxusede Jesús gulé'e Le':

—Che ca' dxaca chee benne' zúalene' nu'ula, quebe dxal-la' súalentu' nu'ula.

¹¹ Jesús guzre' benne' ca':

—Quegá xúgute' benne' gaca xelezí'e dizra' nigá, san tuze benne' ca' ba nun Dios chee' xelezí'e na.

12 Zaj zra' benne' quebe dxelezúalene' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bénneache naca caní. Na' zaj zra' benne' dxelexegá'ane' cá'aze, quebe nu dxelezúalene' chee gaca xelune' zrin chee Dios, Bénnea' dxenná be'e xabáa. Benne' gaca si'e dizra' nigá dxal-la' si'e na.

Jesús dxenabe' gaca chawe' chee bidu ca'

(Mr. 10.13-16; Lc. 18.15-17)

13 Nadxa belezrín benne' lau Jesús zaj naché'e bal-la bidau' chee guzé ne'e bidu ca', ne nabe' Dios gaca chawe' cheebe', san benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. 14 Jesús guzre' le':

—Le güe bidu ca' lataj xeleda'be' naga zua'. Quebe guzrúnnale-be', lawe' da benne' zaj naque' ca bidu caní xelu'e naga dxenná bea Dios xabáa.

15 Nadxa bze Jesús ne'e lawe' bidu ca', na' gudé na' bezé'e lataj na'.

Tu benne' cuide' nape' xel-la' gunní'a

(Mr. 10.17-31; Lc. 18.18-30)

16 Tu benne' cuide' guxíaje' naga zua Jesús, na' bchebe' Le':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

17 Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

18 Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalenu' zru'ula benne' xula. Quebe cuanu'. Quebe nneu' da wen lazre' chee benne'. ¹⁹ Gudapa ba lá'ana xra xrna'u. Bzri'i le sa' ljwezru' ca nazrí'i cuinu'.

²⁰ Benne' cuide' na' gunné':

—Xúgute da caní dxuna' nácatea' bídau'te. ¿Bízradxa quebe ne guna'?

²¹ Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

²² Gate benne' cuide' na' benne' da nigá, bezé'e dxexíaje lazre' lawe' da nápalé'e xel-la' gunní'a.

²³ Nadxa gunná Jesús, dxé'e benne' ca' dxusédene':

—Da li dxapa' le'e, stébele'e naca chu'u tu benne' gunní'a naga dxenná bea Dios xabáa. ²⁴ Da xula dxapa' le'e, chadidxa gaca te tu bea', be dxebía bénneache lu negue' tu xeche' zriche, quézcala chu'u tu benne' gunní'a naga dxenná bea Dios.

²⁵ Gate belenne' benne' ca' dxuséde Jesús da nigá, na' belexebánele'ene', na' buluchebe ljwezre':

—¿Nuzra la xca'?

²⁶ Jesús guné'e benne' ca', ne guzre' le':

—Da nigá quebe gaca xelún bénneache, san Dios waca guné' ca naca.

²⁷ Nadxa gunná Pedro:

—Xran, netu' ba bcá'anantu' ca naca da nápantu', ne zéajentu' Lue'. ¿Bizra gápantu' xca'?

²⁸ Bechebe Jesús:

—Da li dxapa' le'e, ca lu zra na' gate na' xúgutẽ xelexaca na cube, gate neda', Benne' Gulje' Bénneache, cue'a lataj chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, cheẽ guchí'ale cheẽ chazrinnu cue' benne' Israel, benne' judío ca'. ²⁹ Xúgutẽ benne' ca' ba bulucá'anẽ lizrẽ', u benne' bichẽ', u nu'ula zanẽ', u xrẽ', u xrnẽ'e, u zru'ulẽ', u zrí'inẽ', u xezr la xu cheẽ', cheẽ xelunẽ' zrin chia', xezezi'quezẽ' tu gaxúala na, ne xezezi'quezẽ' xel-la' nabán zeajlí canna. ³⁰ Benne' zantẽ zaj naca blau na'a xelaquẽ' benne' bzebe, na' benne' zantẽ zaj naca benne' bzebe na'a xelaquẽ' benne' blau.

20

Da dxulé'e na ca naca cheẽ benne' wen zrin ca'

¹ Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánetẽ cue' xezr la xu guzé'e lizrẽ' che zílala, zéaje' zeajtílaje' benne' wen zrin ca' cheẽ cheajlechibẽ' uva cheẽ'. ² Bca'ana cháwelenē' benne' wen zrin ca' quízruje' tu dumí lazruj cheẽ tu zra, na' gusel-lẽ' benne' ca' zeajleguenẽ' zrin lu xezr la xu cheẽ'. ³ Ca gudé na' guzé'e lizrẽ' ca dxedá na, na' blé'enẽ' benne' zaj zrẽ'e lawe' xi'a zaj nalátajzẽ'. ⁴ Na' guzrẽ' benne' ca': “Cá'anqueze le'e, le chjaca wen zrin lu xezr la xu chia', na' gunna' le'e da naca chawe'.” Na' benne' ca' xjaquẽ'. ⁵ Xrane na' guzé'e da xula wa gubizra, ne cá'anqueze dxexedá' chunna, ne tuze ca benẽ'. ⁶ Xetú du dxedá' gazxu' guxíaje' lawe' xi'a, na' blé'enẽ' zaj zra' na' benne' zaj nalátajzquezẽ', ne

guzre' le': "¿Bizr chee na' zrale le'e nigá bedú zra quebe bi zrin dxunle?"

⁷ 'Gulenné': "Quebe nu ne xe netu' guntu' zrin chee'."

'Na' guzre' benne' ca': "Cá'aqueze le'e, le cheajén zrin lu lina chia', na' gunna' le'e da naca chawe'."

⁸ Gate gul-la' chizrela, xrane na' guzre' benne' xu'u lu ne'e zrin na': "Gunné benne' wen zrin ca', ne gudíruje', su lau' quízruju' benne' ca' belelá' bzébedxa, na' bzébetę quízruju' benne' ca' belelá' nédxute." ⁹ Nadxa belezrín benne' ca' belú'e lu zrin na' gate dxexedadxa gazxu', na' tu tu benne' ca' belezí'e lazruj chee' du naxá' lazruj tu zra wen zrin. ¹⁰ Gudé na' gate belezrín benne' ca' gulu'e nédxute lu zrin na', guléquenę xelezí'e da zrendxa, san cá'aqueze gulezί' tu tu benne' ca' lazruj tu zra wen zrin weaj.

¹¹ 'Gate gulezί'e na, na' gulezú lawe' dxelawe' zria lau xrane zrin na', ¹² dxelenné': "Benne' caní belelá' bzébedxa, tu chí'idau'ze ga belunę zrin, na' gudírujquezu' benne' caní ca' gudíruju' netu', na' netu' bedú zra bentu' zrin, ne ca' naca da la chee zra nigá bchaga launtu'."

¹³ 'Bechebe xrane na', dxe'e tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelęna' lue' quízruja' lue' lazruj tu zra wen zrin? ¹⁴ Guzί' lazruj chiu', ne bexíaj. Neda' dxaca lazra' gunézruja' chee benne' ca' belú'e bzébedxa ca' da gudírujqueza' lue'. ¹⁵ ¿Quebe gaca guna' ca' da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

¹⁶ Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábase benne' ca' xelaque' blau.

Xecha lasa dxuchalaj Jesús ca gaca gate gatie'
(Mr. 10.32-34; Lc. 18.31-34)

¹⁷ Gate xu'u Jesús neza, zexíaje' Jerusalén, guléaje' cheeze benne' chazrinnu ca' dxusédene', ne guzre' le':

¹⁸ —Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchaje' ca' chee bxruze ca', ne lau benne' ca' dxuluxuzájle'e da bdxixruj be'e Dios, na' xelechugue' chia' gatia'. ¹⁹ Xuludée' neda' lu na' benne' zitu' ca' chee xelún le' chia', na' xelu'e neda', ne xuludé'e neda' xaga béguaj, san zra gux-unne zra xebana'.

Da gunaba xrna Jacobo ne Juan
(Mr. 10.35-45)

²⁰ Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén. ²¹ Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabēla chiu', ne xetube' xéglala.

²² Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la'

dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

²³ Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chala'a xabela chia', ne chala'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

²⁴ Gate xechí benne' ca' dxusede Jesús belenne' ca', na' belezré'e dxupa bi chee nu'ula na'. ²⁵ Jesús gunné' benne' ca', ne guzre' le':

—Ba nézele le'e ca dxelún benne' xíchaje chee xezr la xu ca', dxelenná bé'ene' benne' ca', na' benne' nácadxe' blau ládujla benne' ca' dxelenná be'e, dxuchínene' xel-la' dxenná bea chee'. ²⁶ Le'e quebe dxal-la' gunle ca'. Benne' dxaca lazre' gaque' blau ládujla le'e dxal-la' guné' zrin chee xezícadxale le'e, ²⁷ na' bènea' dxaca lazre' gaque' xíchaje cheele, dxal-la' gaque' wen zrin chee xúgutēle le'e. ²⁸ Dxal-la' guné' ca bena' neda', Benne' Gulje' Bénneache, quebe bida' chee nu gun zrin chia' neda', san bla'a chee guna' zrin chee bèneache, ne chee guzúa' xel-la' nabán chia' ca da quízruja' chee guselá' benne' zante.

Jesús dxexunē' chupa benne' la chul-la

(Mr. 10.46-52; Lc. 18.35-43)

²⁹ Gate dxelexedxúaje' xezre Jericó, na' benne' zante zjácāne' Jesús. ³⁰ Naga dxeledé'e zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xē'e, dxelenné':

—Xran, Zri'ine David, bexache lazre' netu'.

³¹ Benne' zan ca' guledil-le' dxúpate' na' chee xelezúe' zrize, san le' gulebezre xe'e zízrajdxá, dx-elenné':

—Xran, Zri'ine David, bexache lazre' netu'.

³² Nadxa Jesús guleze', na' gunné' benne' la chul-la ca', na' bchebe' le':

—¿Bi dxaca lázrele guna' chee?

³³ Belexechebe benne' ca':

—Xran, dxaca lázrentu' xelé'entu'.

³⁴ Jesús bexache lazre' benne' ca', ne bte' xiaj lawe'. Na' belexelé'ete' benne' la chul-la ca', na' xjácálene' Jesús.

21

*Ca da guca gate bexú'u Jesús Jerusalén
(Mr. 11.1-11; Lc. 19.28-40; Jn. 12.12-19)*

¹ Gate belezrín Jesús, ne benne' ca' dxusédene' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédene' chee tu da xelune'. ² Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrodau' zúáleba' leba'. Le sezre-ba', ne le che'e dxúpateba' nigá. ³ Che nu benne' bi xe'e le'e, le xe'e: “Xránadxu nachinne' leba', na' la xesél-la'tequeze'-ba'.”

⁴ Da nigá guca na chee guxá ca da gunná benne' bchálaje' waláz chee Dios, gunné':

⁵ Le xe' benne' zaj zra' xezre Sión:

“Le nna', Benne' nna bé'ene' le'e ze'e naga zúale. Dute' xel-la' dxexruj lazre' zrie' tu burro bzrise'. Zrie' tu búrodau', zri'ine tu be dxua xua.”

6 Nadxa dxupa benne' ca' dxuse_{de} Jesús be-siá'que', ne belune' ca da ba gunná be'e Jesús le'. 7 Xeajlexrí'e burro bzrise', ne zrí'ineba', na' belezrúe' zra lane' cúzruba', na' guzría Jesús leba'. 8 Benne' zan ca' gulechílaje' zra lane' la neza na', na' xebal-le' buluchibe' zina' da buluzale' la neza. 9 Benne' zjaque' lávela, ne benne' zá'aque' bzebe gulezú lawe' dxelebezre xe'e, dxelenné':

—¡Gaca ba lá'azxa Zrí'ine wenná bea David! ¡Ba neza zrente naca na chee bënnea' ze'e waláz chee Xránadxu Dios! ¡Gaca ba lá'azxa Dios!

10 Gate guxú'u Jesús xezre Jerusalén, ca naca bënneache zaj zre'e na' beledxé'ena zrague', na' buluchebe ljwezre':

—¿Nuzra benne' nigá?

11 Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, ze'e xezre Nazaret da nababa Galilea.

Jesús dxuchi'e lu xudau'

(Mr. 11.15-19; Lc. 19.45-48; Jn. 2.13-22)

12 Ca gudé na' guxú'u Jesús dxale'aj xudau' chee Dios, na' bebéaje' xúgute benne' wete, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dxelúti'e bgúgudu ca'. 13 Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bënneache lawa' neda”, san le'e ba nunle na ca tu lizre gubán.

14 Lu dxale'aj xudau' na' gulebiga lau Jesús bal-la benne' la chul-la, ne benne' zrinna' ca', na' Le' bexune' benne' ca'. 15 Belezrá' benne' xíchaje' ca'

chee bxruze ca', ne benne' ca' dxuluxuzájle'e da nadxixruj bea Dios, gate na' belenne' ca' dxelebezre xa'a bidu ca' lu xudau', dxeleennabe': "¡Gaca ba lá'azxa zri'ine wenná bea David!" ¹⁶ Gulé'e Jesús:

—¿Dxennu' ca' dxeleenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba benu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

¹⁷ Nadxa bca'ana Jesús benne' ca'. Bezé'e xezre na', na' bezrine' xezre Betania, naga bejgá'ane' xela na'.

Jesús dxugu'e de' xaga higo

(Mr. 11.12-14, 20-26)

¹⁸ Che zílala ca' zexíaj Jesús xezre na', na' guduné'.
¹⁹ Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete xaga higo na'. ²⁰ Ca belelé'e benne' ca' dxusede Jesús da nigá, na' belexebáne', ne buluchebe' Jesús:

—¿Ájazra na' chadite gubizre xaga higo nigá?

²¹ Bechebe Jesús:

—Da li dxapa' le'e, che nápa'e xel-la' dxeajlí lazre', ne quebe gun chupa lázrele, quegaze da nigá gaca gunle ca da bēna' neda' chee xaga higo nigá, san waca xe'e xi'a nigá: Gucuasa nigá, xeajlsúa

lu nísadau', na' gaca na. ²² Che dxeajlí lázrele, na' xezi'le bíteteze da nábale Dios.

Xel-la' dxenná bea da xu'u lu na' Jesús

(Mr. 11.27-33; Lc. 20.1-8)

²³ Nadxa guxú'u Jesús lu chila xudau', na' dxácate na' dxusédene' benne' zaj zře'e na', gulebiga naga zua Jesús benne' xíchaję ca' cheę bxruze ca', ne benne' gula cheę judío ca', na' buluchebe' Le':

—¿Bi xel-la' dxenná bea napu' dxunu' da caní? ¿Núzraqueze bęnna lue' xel-la' dxenná bea nigá?

²⁴ Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. ²⁵ ¿Nu benne' gusel-le' Juan dxuchúę' bęnneache nisa? ¿Dios, che bęnneacheze?

Gulezú lawę' dxuluchálajle ljwezre', dxelenné':

—Che nnadxu Dios gusel-le' le', na' xę'e dxi'u: “¿Bizr cheę na' quebe guxéajlele cheę?” ²⁶ Che nnadxu bęnneache gusel-le' le', dxal-la' zrębedxu bi xelún benne' zan ca' cheędxu dxi'u, lawę' da dxeleque xúgutę bęnneache bchalaj Juan na' waláz cheę Dios.

²⁷ Cheę le' na' gulé'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

Da dxulé'e na ca naca cheę chupa bi biu cheę tu benne'

²⁸ Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrí'ine' bi biu, na' guzre' tube': "Zrí'ina', guxíaj xeajén zrin lu lina chee uva chia'." ²⁹ Zrí'ine' na' bechébebe': "Quebe dxaca lazra'." Ca gudé na' bexíaje lázrebe', na' guxíajbe' xeajénquezbe' zrin. ³⁰ Cá'anqueze xrabe' na' guxíaję' xeajné'ę xetube', ne guzre'-be', na' bi nigá bechébebe': "Waca, xrae. Na'a cha'a." Quebe guxíajbe'. ³¹ ¿Núlabe' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxę'ę benne' ca':

—Da li dxapa' le'e, benne' wechizruj ca', ne nu'ula dxeledále benne' biu zante xelexú'ę naga dxenná bea Dios nédxudxa ca le'e ³² lawe' da bla' Juan, bedajlé'ene' le'e da naca xrlátaje, na' le'e quebe guxéajlele chee'. Benne' wechizruj ca', ne nu'ula ca' dxeledále benne' biu zante guléajle'ę chee'. Le'e, gate ble'ele da nigá, quebe bexíaje lázrele chee chéajlele chee'.

Da dxulé'e na ca naca chee benne' wen zrin calęla ca'

(Mr. 12.1-12; Lc. 20.9-19)

³³ Nadxa gunná Jesús:

—Le xene ca naca da nadxixruj bea nigá. Tu benne' xrane tu xęzr la xu guze' lba uva ca', ne bene' le'aj chee na. Bene' tu xędxu naga xelesię' uva ca', ne guchisę' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guzė'ę zéaje' zitu'. ³⁴ Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'. ³⁵ Benne' wen zrin ca' gulequę'ę bi wen

zrin chee' ca'. Belúele'e tube', ne belutie' xetube', na' xetube' buluzríe'-be' xiaj. ³⁶ Nadxa xrane na' gusel-ladxe' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. ³⁷ Naga xeajché'tequeze na gusel-le' zrí'inequeze' lawe' da dxéquene': Welape' ba lá'ana zrí'ina'. ³⁸ Gate belelé'ene' zrí'ine', na' benne' wen zrin ca' gulé ljwezre': "Bi nigá xezí' lu na'be' ca naca da caní. Du gute-be' chee xegá'ana cheedxu da caní." ³⁹ Chee le' na' gulele'-be', ne belexebéaje'-be' lu xezr la xu na', na' belutie'-be'.

⁴⁰ Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wen zrin ca'?

⁴¹ Gulé'e Le':

—Gutie' benne' ca' dxeluné' da calela ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

⁴² Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wen xu'u ca' chalá'ala, le' na' naca na xiaj blau na'a.

Da nigá naca na da ben Xránadxu, ne naca na tu da dxexebánedxu.

⁴³ Chee le' na' dxapa' le'e, Dios wequé'e da naca cheele le'e naga dxenná be'e, na' gunézruje' na benne' xeluné' da naca chee xel-la' dxenná bea chee Dios. ⁴⁴ Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

⁴⁵ Gate benne' xíchaje ca' chee bxruze ca', ne benne' xudau' fariseo ca' belenne' da bchalaj Jesús, guleque bé'ene' chee léqueze' bchalaj Jesús da caní. ⁴⁶ Gate gulaca lazre' xełełe' Le', belezrebe' benne' xezre ca' lawe' da dxeléajle benne' ca' naca Jesús benne' dxuchálaje' waláz chee Dios.

22

Da dxulé'e na ca naca chee laní wechaga na'

¹ Guzú lau Jesús dxuchálajlene' benne' ca' xecha lasa tu da dxulé'e na, dxé'e le':

²—Ca da gaca xabáa naga dxenná bea Dios naca na ca da guca gate tu benne' wenná bea bene' tu laní wechaga na' chee bi biu chee'. ³ Gusel-le' benne' wen zrin chee' ca' cheajletupe' benne' ca'an gunné' lizre', san benne' ca' quebe gulaca lazre' xédajgaque'. ⁴ Nadxa gusel-ladxé' benne' wen zrin chee' ca', benne' xula. Dxé'e le': “Le xe benne' ca' gunnía', ba nucueza' xel-la' wagu. Ba gunná be'eda' xelútié' bezre ca', ne be dxelanne, na' ca naca na bache de. Dخال-la' xełełe' nigá naga zra' wechaga na'.” ⁵ Benne' ca' gunné' quebe gulaca lazre' xédajgaque'. Tu benne' ca' guxíaje' lu xezr la xu chee', ne xetú benne' guxíaje' wete. ⁶ Xebal-la benne' ca' guléle' bi wen zrin ca' chee' wenná bea na', na' bulucháchalene'-be', ne belútete'-be'. ⁷ Nadxa wenná bea na' bzrá'ale'e, na' gusel-le' benne' chee' ca', benne' zjaca wedil-la xejleguétie' benne' wete benne' ca', ne xejlezxe'te' lazre' benne' ca'. ⁸ Nadxa guzre' bi wen zrin chee' ca': “Bal-la bi de ba de chee' wechaga na', na' benne' ca' gunnía' quebe zaj naca chee' xełełe'e. ⁹ Le hjaca neza zri'a ca', ne le nne' xúgute

benne' lé'ele, chee xelexé'e laní chee wechaga na'." ¹⁰ Benne' wen zrin ca' xjaque' la neza ca', na' xeajletupe' xúgutę bėnneache, benne' belelé'ene' zaj naque' benne' caleła, ne benne' xrlátaje. Ca'an guca guzrate xu'u na' bėnneache. ¹¹ Nadxa wenná bea na' guxú'e xeajné'e benne' ca' gunné', na' blé'ene' tu benne' dxe'e na', quebe nazi'e zra lane' chee laní chee wechaga na'. ¹² Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee laní wechaga na'?" Bėnnea' gudxé'e zrize. ¹³ Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga naca chul-la, naga cuezre', ne xáguxa'ate lazxe'." ¹⁴ Benne' zante gunnía', na' bábaze' zaj naca chee' xelu'e nigá.

Ca naca chee dumí da dxuluchízruje'
(Mr. 12.13-17; Lc. 20.20-26)

¹⁵ Nadxa benne' fariseo ca' besiá'que', ne belune' tuze dizra' xelebéaje' Jesús dizra' chee xelezéquene' xelawe' zría chee'. ¹⁶ Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee zeajleguezre' Jesús:

—Benne' wesede, nézentu' dxenníu' da li, ne dxusédenu' da li da zaj naca chee Dios, ne quebe dxezrebu' bi xelenná bėnneache, ne quebe dxenná'u ca da zaj napa bėnneache. ¹⁷ Gunná xque. ¿Aja dxéquenu' lue'? ¿Dxun na ba xen quízrujdxu da dxuluchizruj benne' ca' nasel-la César, benne' zitu', che cabí?

¹⁸ Jesús ba nézene' ca da dxelaca lazre' xelune' chee', na' guzre' benne' ca':

—Le'e, láweze dxunle da xrlátaje. ¿Bizr chee na' dxuzúale da guzría xi na neda'? ¹⁹ Le gulé'e neda' dumí na' da dxízrujle chee wechizruj.

Nadxa bulunézruje' Le' tu dumí chee xezre Roma. ²⁰ Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

²¹ Belexechebe':

—Chee César na'.

Na' guzre Jesús benne' ca':

—Le gunezruj chee César da naca chee César, ne le gunezruj chee Dios da naca chee'.

²² Gate belenne' da nigá, na' belexebánene', ne besía'que' naga zua Jesús.

Da buluchebe' Jesús chee benne' xelexebang' ládujla benne' gate

(Mr. 12.18-27; Lc. 20.27-40)

²³ Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

²⁴ —Benne' wesede, Moisés gunné' che tu benne' nuchaga ne'e gatié', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee' sua tu bi chee' benne' ba gutié'. ²⁵ Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'.

²⁶ Cá'anqueze gúcaqueze na chee' bi gudxupe', na' gudé na' chee' bi guxunne', na' cá'anqueze guca chee' xúgutę bi gazre ca'. ²⁷ Ca gudé na', na' gute

nu'ula na'. ²⁸ Gate xelexebán benne' gate, ¿nula bi gazre caní gácabe' benne' chee nu'ula na' lawe' da tu tu bi gazre ca' bchaga na'abe' nen nu'ula na'?

²⁹ Jesús bechebe':

—Le'e dxeque zréajele lawe' da quebe núnbeale da naxúaj na lu xiche lá'azxa, ne ca naca xel-la' waca chee Dios. ³⁰ Gate zrin zra xelexebán benne' gate, québedxa xuluchaga na' bénneache, ne québedxa xelútié' bi nu'ula chee xuluchaga na'abe'. Xelaque' ca zaj naca gubáz chee xabáa chee Dios.

³¹ Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné':

³² “Neda' naca' Dios chee Abraham, ne Dios chee Isaac, ne Dios chee Jacob.” Dios quebe naque' Dios chee benne' gate, san naque' Dios chee benne' ban, benne' ca' ba gulatíe' lu xezr la xu nigá.

³³ Gate belenne' da nigá, na' belexebane benne' ca' ca naca da dxusede Jesús.

Da gunná be'e Dios da naca blau

(Mr. 12.28-34)

³⁴ Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'.

³⁵ Tu benne' ca', benne' naque' benne' dxux-uzájle'e da nadxixruj bea na, guca lazre' guxúe' ájala nne Jesús. Bchebe' Le':

³⁶ —Benne' wesede, ¿bizrla da gunná be'e Dios naca blau?

³⁷ Bechébe Jesús:

—Dxal-la' zri'inu' Xranu' Dios dute xichaj lázrda'u, ne dute bénne'du xu'u, ne dute xel-la' dxéajni'i chiu'. ³⁸ Da nigá naca da nadxixruj bea da blaudxa, ne da dxundxa na ba xen. ³⁹ Da

nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'.
 40 Che tu benne' dxunē' ca zaj naca chupa da nadxixruj bea caní, dxunē' ca naca xúgute da nadxixruj bea da bzuaj Moisés, ne ca naca xúgute da bulusede benne' ca' buluchálaje' waláz chee Dios.

*¿Nuzra zri'ine naca Cristo?
 (Mr. 12.35-37; Lc. 20.41-44)*

41 Dxácatē ne zaj nazraga benne' fariseo ca' na',
 42 Jesús bchebē' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

43 Nadxa guzre Jesús benne' ca':

—¿Ájazra na' David gate bchálaje' chee Cristo dxē'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

44 Xrana' Dios guzre' Xrana':

“Gudxé'e chalá'a xabela chia'

cadxa guzúa' zran ni'u benne' ca' quebe chawe' dxelelé'ene' Lue'.”

45 ¿Ájazra naca na naca Cristo zri'ine David, che David ná'queze dxē'e Le': “Xrana”?

46 Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

23

Jesús dxedil-le' benne' xudau' ca'
 (Mr. 12.38-40; Lc. 11.37-54; 20.45-47)

¹ Nadxa Jesús guzre' benne' ca' zaj zre'e na', ne benne' ca' dxusédene', ² dxenné':

—Benne' ca' dxuluxuzájle'e da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle'e da nadxixruj bea Moisés. ³ Chee le na' le guzúa dizra' chee benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dxelúnqueze' na. ⁴ Dxelune' xua zí'ile'e da quebe dxelezeque xelezúe bénneache, ne dxelenná bé'ene' bénneache chee xelu'e na. Benne' ca' ne quebe dxuluzúe' na netú zrube ne'e chee da dxuluzúe benne' xubla. ⁵ Xúgute da dxelún benne' ca' naca na chee xeledé' bénneache. Dxeledánnene' dxelu'e luzxgue', ne ne'e ladxe' laga naga naxúaj dizra' chee Dios, ne dxelácue' zra lane' da zeajzé luzre na tunna. ⁶ Dxelaca lazre' xelebé'e naga ze láweze naga dxelawe', ne naga naca blau lu xu'u ca' naga dxeledube'. ⁷ Dxelaca lazre' xelapa bénneache le' ba lá'ana la neza ca', ne xelé'e le': "Benne' wesede." ⁸ Na'a le'e, quebe güele lataj nu xe le'e, "Benne' wesede", lawe' da xúgutele nácale bi bíchele tule xetule, ne tuze Benne' dxusédene' le'e, neda', Cristo. ⁹ Quebe nu xe le'e: Xrae, lu xezr la xu nigá, lawe' da zua tuze Xrale, Dios na' zue' xabáa. ¹⁰ Quebe güele lataj nu xe le'e: Xran, lawe' da zua tuze Xránale, neda', Cristo. ¹¹ Bénnea' dxune' zrin chee xezícadxale le'e nácadxe' blau ládujla le'e. ¹² Bénnea' dxucá'ana szren cuine'

wexéxrujla bénnea', na' bénnea' dxaque' dxexruj lazre' wegá'ane' szren.

13 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxsézxujle neza chee xabáa chee quebe nu chu'u na. Lé'equeze quebe dxú'ule, ne quebe dxuele lataj benne' dxelaca lazre' xelu'e.

14 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxejúale lizre nu'ula ca' ba gulate benne' biu chee', na' chee xulé'ele xrlátaje cuínale, dxuwízrale Dios xcha lu xudau'. chee le na' da zrente da guzría xi na le'e.

15 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xezr la xu nigá ne ca naca nísadau' chee si' tu benne' ca naca da zéajlele chee Dios, na' gate bache dxunle na, na' dxugápadxale bénnea' dul-la ca da nabágale le'e chee cuía xi'e lu lataj ba xa'.

16 'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro chee xudau', da na' dxun na le' ba xen. 17 Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'? 18 Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen. 19 Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'? 20 Che nu benne' dxuzétaje'

cugu lá'azxa, quegaze cugu lá'azxa dxuzétajē', san cá'anqueze dxuzétajē' ca naca da zria lawe na. ²¹ Bénnea' dxuzétajē' xudau', quegaze xudau' na' dxuzétajē'. Cá'anqueze dxuzétajē' Dios zuē' lataj na'. ²² Cá'anqueze benne' dxuzétajē' xabáa, dxuzétajē' lataj naga zria Dios, ne Diósqueze, Bénnea' zriē' lataj na' dxuzétajē'.

²³ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle cheē xudau' tu cue' cheē da chi cue' cheē xixruj weaj, ne cheē bínnedu ca' cheē anís, ne cheē cumín. Quebe dxunle da zaj naca na blaudxa da zaj zua na lu da nadxixruj bea na, ca naca cheē gácale xrlátaje, ne cheē xexache lázrele le sa' ljuézrele, ne cheē chéajlele cheē Dios. Da caní zaj naca na da dxun na ba xen gunle, ne quebe gusanle da ca' ba dxunle. ²⁴ La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxí'ajle, na' quebe dxeque be'ele dxí'ajle da naca ca tu camello, be dxelaga benneache.

²⁵ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude. ²⁶ Benne' fariseo la chulla. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

²⁷ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtantē cúzrela, na' lu'ule na nazratē na zrita

chee benne' gate', ne xúgute da sgute. ²⁸ Ca'an nácale le'e. Cúzrela nala'le ca benne' xlátaje, na' lu lázrdaule nazrate na da wen lazre', ne da calela da dxunle.

²⁹ Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálaje' waláz chee Dios, ne dxuele lechítaje lu'a chee benne' xrlátaje ca'. ³⁰ Dxennale: “Chela netu' ba zúantu' gate na' gulezrá' xra xrtauntu' ca', quebe gúcalentu' benne' ca' belutię' benne' ca' buluchálaje' waláz chee Dios.” ³¹ Gate dxennale ca', le'e dxexúnbeaquezle nácale zri'ine zre sua benne' ca' belutię' benne' ca' buluchálaje' waláz chee Dios. ³² Dxusexúzrele dxunle ca da gulezú lau belún xra xrtáule ca'.

³³ 'Be snia nácale, ne xrtia be snia. ¿Ájazra gunle chee gáchele lu da zi' da xa' chee lataj ba xa'? ³⁴ Chee le na' neda' sel-la' chee benne' ca' xuluchálaje' waláz chee Dios, ne benne' sina ca', ne benne' ca' xulusédenę' le'e. Lé'equeze gútele, ne gudá'le xaga béguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xezre xetú xezre. ³⁵ Ca'an gaca, le'e bágale zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu beťe Abel, benne' xrlátaje, ne naga bzrintę béťele Zacarías ládujla naga zua lataj lá'azxa chee xudau' ne lataj naga dxuluzezxe' be xíxre'du ca', be dxelegú'ę lu cugu chee Dios. ³⁶ Da li dxapa' le'e, bénneache zaj zre'ę na'a xeľebague' zria chee xúgute da caní.

Jesús dxebezre' chee xezre Jerusalén
(Lc. 13.34-35)

³⁷ Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzríale xiaj benne' gubáz ca' dxesel-la Dios naga zúale. Zane' lásate guca lazra' gutupa' zrí'inele chia' ca dxun bedxuj, dxutúpaba' be dxé'enedau' zran xrílabá', san quebe guca lázrele. ³⁸ Le nna'xque na'a, lízrele xelexegá'ana na dácheze, ³⁹ lawe' da dxapa' le'e, québedxa lé'ele neda' cadxa zrin zra nnale: La'azxa naca bénnea' ze'e waláz chee Xránadxu.

24

Jesús dxenné' wabía xi' xudau'
(Mr. 13.1-2; Lc. 21.5-6)

¹ Nadxa bedxúaj Jesús xudau', na' dxácate dxexedxúaje' na', gulebiga benne' ca' dxusédené' lau Jesús, ne gulezú lawe' dxuluchálajlene' Le' ca naca chee xudau' na'. ² Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzría cuzru ljwezre na. Ca naca na cuía xi na.

Ca naca da xelunna bea na ba za zra bzebe
(Mr. 13.3-23; Lc. 21.7-24; 17.22-24)

³ Nadxa xjaque' lu xi'a naga zaj ze xaga olivo, na' gate dxe' Jesús na', benne' ca' dxusédené' belezrine' lau Le', ne bagácheze buluchebe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nigá?

⁴ Nadxa Jesús guzre' benne' ca':

—Le guxúe cuínale chee quebe nu si xē le'e. ⁵ Benne' zan xeledé'e. Xelún lazre' xelenné' zaj naque' Cristo, na' xelezí xē'e benne' zan. ⁶ Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe. ⁷ Tu cue' xezr la xu tíl-lalē na xetú cue' xezr la xu, ne tu xezre tíl-lalē na xetú xezre. Wata' gubina', ne welata' xízrawē' ca', ne wazrú' gáteteze na'. ⁸ Xúgute da caní zaj naca na naga dxezú lau ca da xelezaca bēneache.

⁹ 'Nadxa xuludé' le'e naga si sácale, na' bál-lale welútequeze'. Ca naca bēneache xelecuídenē' le'e lawe' da dxunle da naca chia'. ¹⁰ Lu zra na' benne' zan québedxa xeléajlē' chia', na' xelecuídenē' le sa' ljwezre', ne xuludé' le sa' ljwezre' lu na' benne' guledábage' le'. ¹¹ Welelá' benne' zan benne' wen lazre'. Xelenné' dxuluchálajē' waláz chee Dios, na' xelezí xē'e benne' zante. ¹² Lawe' da gáta'le'e da calela, benne' zan québedxa xelezrí'ine' le sa' ljwezre'. ¹³ Bēnea' zua chache' ca zrinte zra bzebe, la bēnea'. ¹⁴ Ca naca dizra' chawe' nigá ca nna bea Dios, zralaj na du gabí'i xezr la xu chee xelén ca naca benne' chee xúgute cue' xezr la xu, na' te na' cheajsé chee xezr la xu nigá.

¹⁵ 'Benne' gulabe' da nigá dxal-la' chéajni'ine'. Daniel, benne' bchálajē' waláz chee Dios, bzuaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa chee xudau', ¹⁶ nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren. ¹⁷ Che tu benne' ze' chju'u chee', quebe dxal-la' xexétajē' bi cheajxeléajē' lu xu'u. Dخال-la'

guzrúnnujte'. ¹⁸ Benne' zue' le'e xixre' quebe dxalla' xezrine' lizre' cheajxezri'e xicha chee' da gácue'. ¹⁹ Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. ²⁰ Le naba Dios quebe gun na ba xen guzrúnnujle beu' zaga, ne quegá lu zra dxupá'anale, ²¹ lawe' da che ca' gaca na, na' da zréntedxa da xelezí saca bénneache ca da quebe ne xezeaque' ca guzú laute zua xezr la xu nigá, ne québedxa bi xezeaque' caní ca te chee da nigá. ²² Che Dios quebe guzáchie' zra ca', na' netú quebe nu la. Guzáchie' na chee gácalene' benne' ca' bache nabéaje' chee'.

²³ 'Chee le na', quebe chéajlele che nu xē le'e: "Le nna'xque, nigá zua Cristo", u che nu xē le'e: "Le nna' xque, na'la zue'." ²⁴ Caní dxapa' le'e lawe' da xelelá' benne' zan, benne' guzrí xē'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrente xululé'ene', ne xelune' xel-la' waca zren ca' chee xelezí xē'e benne' ca' ba nabéaj Dios. Caní xelune' che xelezéquene'. ²⁵ Ba bchálajlena' le'e caníqueze na'a quebe ne gaca na. ²⁶ Chee le na', che nu xē le'e: "Le nna'xque, na' zue' le'e xixre'", quebe chéajle na', u che nu xē le'e: "Le nna'xque, lu xu'u nigá zue'", quebe chéajlele. ²⁷ Ca dxun tu xesa guziu', dxēpe na naga dxalaj gubizra, na' dxelé'edxu na naga dxebía gubizra, ca'an gaca gate xida' neda', Benne' Gulje' Bénneache. ²⁸ Gáteteze de tu da nate, na' dxexezraga laba ca'.

Ca da gaca gate ba zua xelá' Benne' Gulje' Bénneache
(Mr. 13.24-37; Lc. 21.25-33; 17.26-30, 34-36)

29 Na' gunná Jesús:

—Gate bache guca zra na' gate xelezaca zi' bēnneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelexrízequeze ca naca da zaj naca na szren da dx-eledá' lu be'. ³⁰ Nadxa lé'ele zran xabáa da gulé'e na ba zua xelá'a neda', Benne' Gulje' Bēnneache, na' ca naca bēnneache zaj zre'e xezr la xu xelebézrequeze'. Nadxa xelexé'ene' neda', Benne' Gulje' Bēnneache, zezá'a lu beuj zran xabáa, zúale neda' dute xella' dxenná bea, ne da xabáa. ³¹ Nadxa sél-laqueza' gubáz chee xabáa chia' ca', na' xulucuézre' zizraj lúzuba' chee xuluxutupe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

³² 'Le gusede ca naca da dxulé'e xaga higo. Gate dxelexedxé'ene zruze na, ne dxezríá na laga' dxe'ene, ba nézele ba za xaca beu' la. ³³ Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na. ³⁴ Da li dxapa' le'e, xúgute da caní xelaca na nédxula gate quebe ne xelate bēnneache zaj zre'e lu zra na'. ³⁵ Xabáa ne xezr la xu weledé chee na. Dizra' chia' quebe te chee na.

³⁶ Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

³⁷ 'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bēnneache. ³⁸ Ca lu zra ca' gate quebe ne gun Dios nisa xiuj da guzríá xi na bēnneache, gulezrá' bēnneache ca'

dxel'éaj dxelawe', ne dxuluchaga ne'e, ne dxulunézruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca. ³⁹ Quebe guleque bé'ene' ca da dxal-la' gaca na, cadxa bzrin zra guca xiuj na', ne bete na ca naca benne' ca'. Cá'anqueze gaca gate xelá'a neda', Benne' Gulje' Bénneache. ⁴⁰ Ca lu zra ca' xelezrá' chupa benne' biu le'e xixre'. Tue' xeché'e, na' xetúe' xegá'ane'. ⁴¹ Xelezrá' chupa nu'ula dxelútue'. Tue' xeché'e, na' xetúe' xegá'ane'. ⁴² 'Le sua le'e ban lazre' lawe' da quebe nézele bi zra xelá'a neda', Xránale. ⁴³ Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'. ⁴⁴ Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

Benne' wen zrin li lazre', ne benne' wen zrin quebe naque' li lazre'

(Lc. 12.41-48)

⁴⁵ Na' gunná Jesús:

—¿Nuzra na' benne' wen zrin li lazre' ne dxéajni'ine', bénnea' xrane' dxucá'analene' le' benne' zaj zre'e lizre' chee gunézruje' da xelawe' gate zrin zra chee na? ⁴⁶ Ba neza naca na chee benne' wen zrin na', gate xezrin xrane', lé'ene' le' dxune' ca naca da nabague'. ⁴⁷ Da li dxapa' le'e, xrane' gucá'analene' le' ca naca da nape'. ⁴⁸ Che benne' wen zrin na' gaque' benne' wen da calela, ne guéquene' quebe xelá' ze xrane', ⁴⁹ ne che su lawe' gusaca zi'e xezícala benne' wen zrin ca', ne xi'aj gágulene' benne' dxelezuzre', ⁵⁰ nadxa xrane'

xezrine' zra gate québela dxebeze'. Gaca na zra quebe nézene', ⁵¹ na' gusaca zí'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate lazxe'.

25

Da dxulé'e na ca naca chee chi nu'ula cuide'

¹ Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequ'é xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. ² Gazzu' nu'ula caní gulaque' gat lazre', na' xegazxu' nu'ula caní zaj naque' ban lazre'. ³ Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegué'e lu xi' chee' ca'. ⁴ Nu'ula ban lazre' ca' belú'e xi' chee' ca', ne da za zxezxe na da xelegué'e na. ⁵ Lawe' da guzré benne' wechaga na', na' gulaca wase ca zaj naque', na' xúgute' gulasie'. ⁶ Dxela ben tu chi'i benne' dxebezre xe'e, dxenné': “Ba za' wechaga na'. Le dxuaj si' lu na'le le'.” ⁷ Xúgute' nu'ula cuide' caní gulase', na' gulezú lawe' bulugale' xi' chee' ca'. ⁸ Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': “Le gunna late' da za zxezxe na cheentu', lawe' da ba dxelexula xi' cheentu'.” ⁹ Nu'ula ban lazre' ca' belexechebe': “Quebe gaca, lawe' da che gúnnantu' late' chee, quebe gaca na da dxechínnentu' netu', ne da dxechínnele le'e. Le chjácala naga dxutie' na, ne le cheajxri' chee.” ¹⁰ Dxácatę zjaca nu'ula ca' quebe zaj naque' ban

lazre', na' bezrín wechaga na'. Nu'ula ban lazre' ca' gulu'e nen le' lu laní chee wechaga na', na' bsezxuj dxa xu'u na'. ¹¹ Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." ¹² Le' bechebe': "Cabata'. Da líqueze quebe núnbe'a le'e."

¹³ Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

Da dxulé'e na ca naca chee benne' gulezí'e dumí

¹⁴ Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wen zrin chee' ca', ne bcá'analene' bi wen zrin ca' dumí chee'.

¹⁵ "Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee tu tube' ca da xelezéquebe' xuluchínebe' na. Nadxa guzé'e zéaje' zitu'. ¹⁶ Bi wen zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. ¹⁷ Cá'anqueze bi wen zrin na' guzi'be' chupa cue' dumí, bezi'be' xechupa cue' dumí. ¹⁸ Bi wen zrin na' guzi'be' tu cue' dumí na' guxíajbe', ne bcáchebe' dumí chee xránabe' tu lu xedxu da benbe' lu xu.

¹⁹ 'Zane' iza ba guca gate bezrín xrane bi wen zrin ca', na' guzú lawe' dxezi'e da bdee' lu na' bi wen zrin ca'. ²⁰ Nedxu bzrin bi wen zrin na' guzi'be' gazxu' cue' dumí, na' bnézrujbe' xránabe' xegazxu' cue' dumí, na' gúzrebe' le': "Xran, bennu'

neda' gazxu' cue' dumí. Nigá de xegazxu' cue' da bezi'a nen dumí chiu'." ²¹ Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubelé'e." ²² Gudé na' bzrin bi wen zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá de xechupa cue' da bezi'a nen dumí chiu'." ²³ Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubelé'e." ²⁴ Gate bzrin bi wen zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné xue, ne dxezi'u da quebe guzu', ne dxexeca'u da quebe besiu'. ²⁵ Chee le na' bzreba', na' guxá'a xeajcáchia' dumí chiu' lu xu. Nigá de da naca chiu'." ²⁶ Na' xránabe' guzre' lebe': "Nacu' bi wen zrin calela, ne zrawede. Ba nézqueznu' dxezi'a da quebe guza', ne dxexecá'a da quebe besia'. ²⁷ Chee le na' la xju'u dumí chia' na' lu na' benne' dxelízruje' chee dumí da dxuluchínene', na' gate za' neda', na' xezi'a da naca chia' nen da belezí'e." ²⁸ Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na' bennea' nape' chi cue' dumí. ²⁹ Benne' nape' wazidxe' da zrendxa, na' benne' quebe nape', ca late' da du na' nape' wecá'a na. ³⁰ Ca naca bi wen zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'atę lázxabe'."

Ca gun Dios gate guchi'e chee benneache zaj zre'e

xęzr la xu

³¹ Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz cheę xabáa chia', na' cué'queza' lataj naga nna be'a, da naca na da xabáa. ³² Na' bénneache cheę xúgute cue' xęzr la xu xelexezrague' lawa' neda', na' xebéaja' cha cheę' ca dxun benne' dxuxúę' zrila'. xebéaje' chíbudu ca' ládujla zrila' ca'. ³³ Guzrá'a benne' ca' zaj naca zrila' chia' chalá'a xabeła chia', na' benne' ca' zaj naca ca chíbudu ca' guzrá'a le' chalá'a xéglala chia'. ³⁴ Nadxa xapa' benne' ca' zaj zra' chalá'a xabeła chia': “Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' cheele gate na' bene' xęzr la xu nigá. ³⁵ Caní dxaca lawe' da guduna, na' bgágule neda'. Gubíleda', na' bėnnale da gu'a. Gudá' ca tu benne' xu'e neza, na' gulu'ule neda' lízrele. ³⁶ Bxázejeda' zra lana' gácua', na' bgácule neda'. Quebe chawe' guzúa', na' bedajná bale neda'. Guxu'a lizre xia, na' bedajná bale neda'.” ³⁷ Nadxa benne' xrlátaje caní xelenné': “Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebilenu', na' bėnnantu' da gu'u? ³⁸ ¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexázejenu' zra lanu', na' bgácuntu' Lue'? ³⁹ ¿Bata bėnentu' quebe chawe' zu', u xu'u lizre xia, na' bedajná bantú' Lue'?” ⁴⁰ Neda' xecheba': Da li dxapa' le'e, ca da benle cheę bėnnedu caní, benne' zaj naca dxexruj lazre', cheę néda'queza' benle ca'.

⁴¹ 'Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa

cuita' neda', le'e, nácale wen da calela lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. ⁴² Caní dxaca lawe' da guduna', na' le'e quebe bennale da gawa'. Gubíleda', na' quebe bennale da xí'aja'. ⁴³ Gudá' ca tu benne' xu'e neza, na' quebe gulu'ule neda' lízrele. Bxázejda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajná bale neda'. ⁴⁴ Nadxa benne' ca' xeléqueze' neda': "Xran, ¿bata blé'entu' Lue' dxedunu', u dxebilenu', u xu'u neza, u dxexázejnu' zra lanu', u quebe chawe' zu', u xu'u lizre xia, na' quebe gúcalentu' Lue'?" ⁴⁵ Neda', benne' wenna' bea, xecheba': Da li dxapa' le'e, lawe' da quebe bi benle chee bennedu caní, benne' zaj naca dxexruj lazre', quebe bi benle chee néda'queza'. ⁴⁶ Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

26

Dxelílaje' ájala xelele' Jesús

(Mr. 14.1-2; Lc. 22.1-2; Jn. 11.45-53)

¹ Gate bexuzre bchalaj Jesús caní, na' guzre' benne' ca' dxusédenē':

² —Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bennache chee' lu xezr la xu Egipto, na' neda', Benne' Gulje' Bennache, xuludéē' neda' lu na' benne' xuludéē' neda' xaga béguaj.

³ Ca lu zra na' benne' xíchaje ca' chee bxruze ca', ne benne' dxuluxuzájlē' da bdxixruj Moisés,

ne benne' gula sina ca' chee judío ca', belezrague' chale'aj chee xu'u zaca chee Caifás, bxruze blau. ⁴Na' belíajé' ájala xelele' Jesús lu da wen lazre' chee xelútie' Le'. ⁵Gulenné':

—Quebe gundxu na lu zra laní nigá, chee quebe xeledábaga benne' ca' dxi'u.

*Tu nu'ula dxegu'e Jesús da dxelá zixre
(Mr. 14.3-9; Jn. 12.1-8)*

⁶Zua Jesús xezre Betania lizre Simón, bènnea' güé'ene' we' guzru'. ⁷Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácale'e na. Gate na' dxe' Jesús ga dxelawé', na' nu'ula nigá gulu'e na xichaj Jesús. ⁸Gate belelé'e benne' ca' dxusede Jesús da nigá, na' belezré'e, ne gulezú lawe' dxelenné':

—¿Bizr chee na' guzría xi' da nigá? ⁹Da nigá waca la gudá'u na sí'adxu da zrente, chee gácale dxu benne' xache' ca'.

¹⁰Jesús benne' da nigá, na' guzre' benne' ca':

—¿Bizr chee na' dxunle nu'ula nigá zede? Da nigá bene' naca na tu da xrlátaje. ¹¹Benne' xache' ca' tu zrázqueze' ládujla le'e, na' neda' quegá tu súaleza' le'e. ¹²Ca naca da ben nu'ula nigá, gulu'e da zixre na' bel-la' dxen chia', naca na da xucá'ana chawe na neda' chee zra gachia' lu xedxu ba. ¹³Da li dxapa' le'e, gáteteze xuluchálaje' dizra' chawe' chia' nigá du gabí'i xezr la xu, na' zrálajqueze ca da ben nu'ula nigá, chee cheajlesá lazre' bènneache le'.

*Judas dxexebe lazre' gudé'e Jesús
(Mr. 14.10-11; Lc. 22.3-6)*

¹⁴ Nadxa tu benne' chazrinnu ca' dxusede Jesús, bènea' le' Judas Iscariote, guxíaje' xeajchálajlene' benne' xíchaje' ca' chee bxruze ca'. ¹⁵ Guzre' le':

—¿Ájate gúnnale neda' che ca' gudéa' Jesús lu na'le?

Nadxa benne' ca' gulízruje' le' chi dxua dumí plata. ¹⁶ Ca lu zra na' guzú lau Judas dxexíaje' ájala guné' gudée' Jesús lu na' benne' ca'.

Da dxágudxu chee xucúbedxu ca guca gate gute Xránadxu

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxusede Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee laní pascua chee benne' judío?

¹⁸ Jesús guzre' le':

—Le chjaca lu xezre na', naga zua lizre tu benne', na' le xe'e: “Bennea' dxusédene' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda'.”

¹⁹ Benne' ca' dxusede Jesús belune' ca da gunná bé'ene' le', na' bulucueze' da xelawe' chee Laní Pascua.

²⁰ Gate gula chizrela, na' gudxé' Jesús ga gawe' tu zren nen benne' ca' dxusédene'. ²¹ Dxácaté na' dxelawe', guzre Jesús benne' ca':

—Da li dxapa' le'e, tule le'e naca bènea' gudée' neda' lu na' benne' ca' dxelune' da calela.

22 Nadxa benne' ca' belexewí'inele'e, na' gulezú lawe' tu tue' dxuluchebe' Jesús:

—Xran, ¿quebe naca neda'?

23 Na' bechebe Jesús:

—Bénnea' dxudé ne'e lu xé'ena tu zren nen neda', benne' na' gudé'e neda'. 24 Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bénnea' gudé'e neda'. Cháwedxa naca la quebe gulaj bénnea'.

25 Nadxa gunná Judas, bénnea' gudé'e Jesús, dxenné':

—Benne' dxusede, ¿quebe naca neda'?

Na' bechebe Jesús, gunné':

—Awe', lue' na'.

26 Dxácate dxelawe', Jesús guqu'é'e xeta xtila, na' guzre' Dios: “Xcalenu.” Gudé na' bzúzruje' na, na' bnézruje' na benne' ca' dxusédene', dxenné':

—Le gagu. Da nigá naca na bel-la' dxen chia'.

27 Gudé na' guqu'é'e tu zriga', na' guzre' Dios: “Xcalenu”, na' bnézruje' na benne' ca', dxenné':

—Le xi'aj xúgutele da xuzru lu zriga' nigá. 28 Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zante chee gunité lau Dios dul-la zai nabaga benne' ca'. 29 Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

*Jesús dxenné' nna Pedro quebe núnbe'e Le'
(Mr. 14.26-31; Lc. 22.31-34; Jn. 13.36-38)*

30 Ca gudé belul-le' chee Dios, na' gusiá'que' zjaque' lu Xi'a Xaga Olivo Ca'. 31 Nadxa Jesús guzre' benne' ca':

—Xúgute le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dínnaiba'." ³² Gate te xebana' neda', cha'a neda' ga nababa Galilea nédxudxa ca le'e.

³³ Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

³⁴ Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

³⁵ Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusede Jesús.

*Jesús dxuchálajlene' Dios naga zaj zxe' xaga olivo ca' nazí le na Getsemaní
(Mr. 14.32-42; Lc. 22.39-46)*

³⁶ Nadxa bzin Jesús nen benne' ca' dxusedene' tu lataj nazí le na Getsemaní, na' guzre' le':

—Le cue'e nigá dxácatę cha'a neda', guchálajlene' Dios.

³⁷ Jesús guché'e Pedro, ne dxúpatę zri'ine Zebedeo, na' guzú lawe' bewí'inele'ene' ne guzúale'e stebe. ³⁸ Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

³⁹ Nadxa Jesús guzé'e zéaje' xelate' caníladxa, na' gute' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

⁴⁰ Nadxa bezrín Jesús naga zaj zra' benne' ca' dxusédeneḡ, na' blé'eneḡ benne' ca' dxelásiē, na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? ⁴¹ Le nnaze, ne le guchálajle Dios chee quebe gun zréaje da xriwe' le'e. Da li bēne'du xu'ule dxaca lázre'le'e na, san lu bela' dxen cheele dxate ni'a na'le.

⁴² Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

⁴³ Ca gudé na' bezrineḡ, ne belé'eneḡ benne' ca' dxusédeneḡ, dxelásiē' lawe' da ba dxeleZRude' lawe' dxelaca wásele'e. ⁴⁴ Bca'aneḡ benne' ca', guzé'e zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache. ⁴⁵ Nadxa bezrineḡ naga zaj zra' benne' ca' dxusédeneḡ, na' guzre' le':

—Le gase na'a, ne le xezí' lazre'. Ba bzin zra gate neda', Benne' Gulje' Bēneache, tea' lu na' benne' dul-la ca'. ⁴⁶ Le chasa, ne le chu'u. Ba za bēnea' dxudé'e neda'.

Dxelech'é Jesús ca tu benne' wen da zrinnaj
(Mr. 14.43-50; Lc. 22.47-53; Jn. 18.2-11)

⁴⁷ Ne dxuchálajte Jesús na' gate bzin Judas. Naque' tu benne' chazrinnu ca', na' zá'acale benne' zante'le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje

ca' chee bxrúze ca', ne benne' gula sina ca' chee judío ca'. ⁴⁸ Judas, bēnea' dxudēe' Jesús, ba blé'ene' benne' ca' ca tu da gunē' da gulé'e na nu na' naca Jesús. Gunné':

—Bēnea' gunupa' neda', Le' na'. Le che'e ca tu benne' wen da zrinnaj.

⁴⁹ Nadxa bzin Judas lau Jesús, dxenné':

—Diuzre, Benne' dxusede.

Na' bnupē' Jesús.

⁵⁰ Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

⁵¹ Tu benne' ca' dxusede Jesús guléaje' xia chee', ne guchugue' chalá'a naga bi wen zrin chee bxrúze blau. ⁵² Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'. ⁵³ ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee xabáa, zaj naque' zánete tu tu cue'? ⁵⁴ Na'a che ca'an guna', ¿ájazra gaca gaca na ca da naxúaj na lu xiche chee Dios, da dxenná na caní dxal-la' gaca na?

⁵⁵ Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute zra gudxe'a neda' lu xudau' dxusededa' le'e, ne quebe gudélale neda'. ⁵⁶ Xúgute da caní dxaca na chee gaca na ca da gulenná benne' ca' buluchálaje' waláz chee Dios, da na' naxúaj na lu xiche chee Dios.

Nadxa xúgute benne' ca' dxusede Jesús bu-
lucá'ane' Le' tuze', buluxuzrúnnuje'.

*Dxezrín Jesús lau benne' ca' chee xu'u lawe' blau
chee judío ca'*

*(Mr. 14.53-65; Lc. 22.54-55, 63-71; Jn. 18.12-14,
19-24)*

⁵⁷ Benne' ca' gulele' Jesús guleché'e Le' lau
Caifás, bxruze blau, ga na' zaj nazraga benne' ca'
dxuluxuzájle'e da bdixruj be'e Moisés, nen benne'
gula sina ca'. ⁵⁸ Pedro zéaje nawe' Jesús zítu'la, na'
bzrine' chale'aj chee lizre bxruze blau, na' guxú'e,
ne gudxé'e tu zren nen bi xa'aga chee lé'ene' ájala
xexuzre da dxaca na'.

⁵⁹ Benne' xíchaje ca' chee bxruze ca', ne benne'
gula sina ca', ne xúgute benne' ca' chee xu'u lawe'
blau chee judío ca' belílaje' ájala xuluzría xi'e Jesús,
lácala naca na da wən lazre', chee xelezéquene'
xuludée' Le' gatie'. ⁶⁰ Quebe bi belezrelne', lácala
belezrín benne' zan benne' gulenné' da wən lazre'
chee Jesús. Naga xeajsete na belezrín chupa
benne' wən lazre'. ⁶¹ Dxelenné':

—Benne' nigá gunné': “Wazéqueda' neda'
guchínnaja' xudau' chee Dios, na' xexuna' na lawe'
chunna zraze.”

⁶² Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné'
chiu' lue'?

⁶³ Jesús guzúe' zrize. Nadxa bxruze blau na'
guzre' Le':

—Lu La Dios ban dxenná be'eda' lue' nneu' da li.
Gunná che nacu' lue' Cristo, Zri'ine Dios.

⁶⁴ Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabela chee Dios nen xel-la' szren chee', na' xelá'a lu beuj bza chee xabáa.

⁶⁵ Nadxa bxruze blau gucheze' zra lanē' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechebe'? Ba bénqueze le'e ca dizra' schanni' dxenné'. ⁶⁶ ¿Bi dxennale le'e?

Benne' ca' gulenné':

—Nabague' zria, ne dxal-la' gatiē'.

⁶⁷ Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'. ⁶⁸ Na' gulé'e Le':

—¿Nácaquezu' Lue' Cristo? Gunné xa'a nu be Lue'.

Dxenná Pedro quebe núnbe'e Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Dxácatē na' dxe' Pedro chalé'ajla, na' tu nu'ula wēn zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

⁷⁰ Pedro bēn chúchue' xrtizre' lówela xúgute benne' ca', gunné':

—Quebe nezda' nu chee na' dxenníu'.

⁷¹ Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'e na':

—Cá'anqueze benne' nigá dxedálēne' Jesús, benne' Nazaret na'.

⁷² Xecha lasa bēn chúchue' Pedro xrtizre', na' bzétaje' Dios, gunné':

—Quebe núnbe'a benne' na'.

⁷³ Xetú chí'idau' guca belezrín benne' zaj zre'e na' lau Pedro, na' gulé'e le':

—Da li, tuze nácaquezu' nen bénnea' lawe' da xella' dxenné chiu' dxunna bea na lue'.

⁷⁴ Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácatę na' gudxezre xjeaj. ⁷⁵ Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

27

Dxeleché'e Jesús lau Pilato

(Mr. 15.1; Lc. 23.1-2; Jn. 18.28-32)

¹ Gate guxaní', xúgute benne' xíchaje ca' cheę bxruze ca', ne benne' gula sina ca' cheę benne' judío ca' belune' tuze dizra' ájala xelune' cheę xelútię' Jesús. ² Nadxa beleché'e Le' nadxéaje', ne xeajlegu'e Le' lau Poncio Pilato, benne' dxenná be'e waláz cheę xezr la xu Roma.

Ca guca gate gute Judas

³ Nadxa Judas, bénnea' bdeę' Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje ca' cheę bxruze ca', ne benne' gula sina ca'.

⁴ Dxe'e le':

—Neda' bęna' dul-la lawe' da bdea' tu benne' naque' du lazre' cheę gatię'.

Belexechebe benne' xíchaje ca':

—¿Bizra naca cheętu' da nigá? Chiu' lue' naca da na'.

⁵ Nadxa Judas buzale' dumí na' lu xudau', ne bezé'e, na' xeajxelú'u du lbe'e.

⁶ Benne' xíchaję ca' cheę bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí cheę xudau', lawe' da naca na lazruj cheę benne' dxute benne'.

⁷ Nadxa belunę tuze dizra' xelá'awe' tu xęzr la xu nen dumí na' da nazí le na xęzr la xu cheę wen xesu' zruaga, cheę gaca na tu lataj naga xelegache benne' zitu'. ⁸ Cheę le na' nazí le xęzr la xu na' Xęzr La Xu Cheę Dxen ca lu zra na'a zra. ⁹ Caní guca na cheę gaca ca da gunná Jeremías, benne' bchálaję' waláz cheę Dios, gunné': “Gulequę'e chi dxua dumí plata da naca na da zaca Le' da buluzúa benne' Israel. ¹⁰ Nen dumí na' belá'awe' xęzr la xu cheę benne' wen xesu' zruaga, cáteze gunná be'e Xrana' neda'.”

Dxezrín Jesús lau Pilato

(Mr. 15.2-5; Lc. 23.3-5; Jn. 18.33-38)

¹¹ Guleché'e Jesús lau bënnea' dxenná be'e waláz cheę xęzr la xu Roma, na' le' bchebe' Jesús:

—¿Nacu' Lue' Wenná Bea cheę judío ca'?

Jesús gunné':

—Ca' naca na, ca dxennáu' lue'.

¹² Gate benne' xíchaję ca' cheę bxruze ca', ne benne' gula sina ca' gulawe' zria cheę Jesús, na' Le' quebe bi bechebe'. ¹³ Nadxa gunná Pilato, dxę'e Jesús:

—¿Quebe dxennu' ca da dxelenná benne' caní chiu'?

¹⁴ Jesús quebe bi bechebe'. Ca'an guca bebanne bënnea', ne quebe bezrela lazre' ájala nne'.

Dxelechugue' chee Jesús gatie'
(Mr. 15.6-20; Lc. 23.13-25; Jn. 18.38—19.16)

¹⁵ Gate dxu'u laní na', bénnea' dxenná be'e na' xu'u lawe' dxusane' tu benne' wen da zrinnaj, núteteze benne' dxelaca lazre' benne' ca'. ¹⁶ Ca lu zra na' xu'u tu benne' lizre xia, benne' wénle'e da zrinnaj, nazí le' Barrabás. ¹⁷ Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bénnea' le' Cristo?

¹⁸ Caní gunné' lawe' da ba nézene' buludée' Jesús lawe' le' lawe' da dxelaque' xa lazre' chee Jesús.

¹⁹ Dxácatē na' dxe' Pilato naga dxuchi'e chee bénneache, na' zru'ule' gusel-le' tu benne' xeajezre' Pilato: “Quebe guchixre chiu' da naca chee benne' xrlátaje na', lawe' da guneda' xela ba dxele, da bzúale'e na neda' stebe ne chee Le'.”

²⁰ Benne' xíchaje ca' chee bxruze ca', ne benne' gula sina ca' belegú'u xele' benne' ca' chee xelenabe' la Barrabás, ne gate Jesús. ²¹ Bénnea' dxenná be'e bchálajlene' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

²² Pilato bchebe' benne' ca':

—¿Bizra guna' chee Jesús, benne' le' Cristo?

Xúgute' belexechebe':

—Bde'e xaga béguaj.

²³ Nadxa gunná Pilato, dxē'e benne' ca':

—¿Bizra da calela nune'?

Benne' ca' gulezú lawe' dxelebezre xe'e, gu-lenné':

—Bde'e xaga béguaj. Bde'e xaga béguaj.

²⁴ Gate Pilato guque bé'ene' quebe bi séquene', na' benne' zan ca' dxeledábague' le', na' gunná bé'ene' bla' nisa, na' gudibe ne'e lávela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

²⁵ Xúgute benne' ca' belexechebe':

—Netu', ne zrí'inentu' nabáantu' ca naca chee xel-la' gute chee'.

²⁶ Nadxa Pilato bsane' Barrabás, ne gunná bé'ene' beleché'e Jesús chee xelu'e Le', na' bdee' Le' chee te'e xaga béguaj.

²⁷ Nadxa benne' dxjaque' wedil-la chee bènnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús. ²⁸ Belequé'e zra lane', ne bulugácue' Le' tu ladxe' bzawe. ²⁹ Buluzúe' xíchaje' tu da naca na zruze xaga xeche', ne buluguxre' Le' tu xaga ne'e xabela. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

³⁰ Cá'anqueze buluzré'e Le' zrene', na' gulequé'e xaga da nuxru Jesús, ne guline' na xíchaje'. ³¹ Ca gude belún le' chee Jesús, na' belexegüe' ladxe' bzawe, na' buluxugácue' Le' zra lánaqueze'. Nadxa beleché'e Le' chee te'e xaga béguaj.

*Dxuludé'e Jesús xaga béguaj
(Mr. 15.21-32; Lc. 23.26-43; Jn. 19.17-27)*

³² Ca gusiá'que' na', belexezrague' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

³³ Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate. ³⁴ Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

³⁵ Ca bexuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelexelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': "Belexelé'e zra lana' leze'. Gulebéaje' da gaca bea na." ³⁶ Nadxa gulebé'e dxuluzuzre' Jesús. ³⁷ Buluzríe' xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

³⁸ Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabela, ne xetúe' chalá'a xéglala ga da' xaga béguaj chee Jesús. ³⁹ Benne' dxeledé'e na' dxelún le' chee Jesús. Dxulutá xíchaje', ⁴⁰ ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

⁴¹ Cá'anqueze belún la chee' benne' xíchaje ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

⁴² —Bselé' benne' xula, san quebe dxezéquene' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na'

chéajlədxu chee'. ⁴³ Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

⁴⁴ Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

Ca guca gate gute Jesús

(Mr. 15.33-41; Lc. 23.44-49; Jn. 19.28-30)

⁴⁵ Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. ⁴⁶ La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

⁴⁷ Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

⁴⁸ Dxácatē na' guzá' chegu tu benne' ca', xeajxri'e tu da dxezrupe nisa, na' ca bsebise' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na. ⁴⁹ Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

⁵⁰ Xecha lasa gudxezre xa'a Jesús, na' gutie'.

⁵¹ Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. ⁵² Gulexalaj ba, na' belexebán benne' gate ca', benne' guléajle'e da naca chee Dios. ⁵³ Ca gudé bebán Jesús, na' benne' caní belexedxúaje' lu

xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

⁵⁴ Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne kezícadxa da ca'an gulaca, na' belezrébele'e, dxelenné':

—Da lítegaze benne' nigá guque' Zri'ine Dios.

⁵⁵ Nu'ula zan zaj zre'e na' dxelenné'e zítu'la, nu'ula ca' xjácalene' Jesús gate bezé'e ga nababa Galilea, ne gulácalequeze' Le'. ⁵⁶ Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

Dxulucache' Jesús lu xedxu ba

(Mr. 15.42-47; Lc. 23.50-56; Jn. 19.38-42)

⁵⁷ Ca guzú lau dxaca waxrinne, na' bla' tu benne' gunní'a le' José, benne' xezre Arimatea, benne' dxéajlequeze' chee Jesús. ⁵⁸ Benne' nigá guxíaje' xeajchálajlene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'. ⁵⁹ Nadxa José bequé'e bel-la' dxen na', na' bchele' na tu ladxe' da naxadxe. ⁶⁰ Nadxa gulu'e Le' lu ba da naca na cheéqueze José na', da bene' tu lu xiaj. Gulexrúe' tu xiaj blaga zren dxu'a ba chee Jesús, na' bezé'e ga na'. ⁶¹ Gulezrá' María Magdalena, ne xetú María, zaj dxe'e le nna' dxu'a ba na'.

Dxulubia dxuluxe' ba chee Jesús

⁶² Zeaj zra xula, da naca na zra ca gudé zra bulucueze', na' benne' xíchaje ca' chee bxruze ca', ne benne' xudau' fariseo ca' belezrine' lau Pilato.

⁶³ Dxelé'e le':

—Xran, dxeajsá lázrentu' ca naca da gunná benne' wēn lazre' na' gate na' zue'. Gunné' gate gaca chunna zra, na' xebané' ládujla benne' gate. ⁶⁴ Chee le na', bdixruj be'ene' benne' ca' xulubia xuluxue' ba chee' na' cadxa gaca chunna zra, chee quebe xeledá' benne' ca' bsédene' xedajlexebéaje' be'l-la' dxen na' chizrela, na' te na' xuluzenne' bēneache ba bebane' ládujla benne' gate. Che ca'an gaca, na' dizra' wēn lazre' bzebe nigá gun na da zrinnaj zrendxa ca da nedxu.

⁶⁵ Pilato guzre' benne' ca':

—Na' zaj zra' benne' dxjaque' wedil-la xuluzre' na. Le chjaca le'e, ne le guxúe xanne' ba na' ca se lau séquele.

⁶⁶ Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

28

Ca guca gate bebán Jesús

(Mr. 16.1-8; Lc. 24.1-12; Jn. 20.1-10)

¹ Ca gudé chee zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlenné'e ba chee Jesús. ² Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na. ³ Gubáz na' dxácatite legale', ne naca chiche zra lane' ca bezxe'. ⁴ Gate belelé'e benne' dxjaque' wedil-la gubáz chee xabáa na', na' belezrízene' xel-la' dxelezrebe, ne belexegá'ane' ca

benne' gate ca'. ⁵ Nadxa gunná gubáz chee xabáa na', dxē'e nu'ula ca':

—Quebe zrēbele. Nezda' dxexílajle Jesús, bēnea' gudē'e xaga béguaj. ⁶ Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'. ⁷ Le cheajxáquezega, le cheajezre benne' ca' bsēdene' ba bebane' ládujla benne' gate, na' chéaje' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

⁸ Nadxa nu'ula ca' besiá'que' dxu'a ba na', zeajxaca chégüē'. Dxelezrebe', ne dxelebenē'. Zjaque' zeajleguezre' benne' ca' bsede Jesús. ⁹ Dxácatē na' Jesús bchague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. ¹⁰ Le' guzre' nu'ula ca':

—Quebe zrēbele. Le chjaca, le cheajézre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

Ca da gulenná benne' dxjaque' wedil-la

¹¹ Dxácatē zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje ca' chee bxruze ca' ca da guca. ¹² Benne' xíchaje ca' buluchálajlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente'. ¹³ Dxeleonné':

—Le nna le'e belelá' benne' ca' bsede Jesús na' chizrela, dxácatē dxásele le'e, na' belexexú'e bel-la' dxen chee'. ¹⁴ Che benne' dxenná be'e na' xenne' da nigá, netu' guchálajlentu' le', ne gucá'ana cháwentu' chee quebe bi gaca cheele le'e.

¹⁵ Nadxa benne' dxjaque' wedil-la gulezí' lu ne'e dumí na', na' besiá'que' belune' ca' bache zaj

nézene'. Da nigá naca na ca dxelenná judío ca' zéajte lu zra na'a zra.

*Jesús dxesel-le' benne' gubáz chee' ca'
(Mr. 16.14-18; Lc. 24.36-49; Jn. 20.19-23)*

¹⁶ Nadxa xjaca benne' chinéaj ca' bsede Jesús, na' belezrine' lu xi'a naga ba guzre Jesús le'. ¹⁷ Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. ¹⁸ Nadxa Jesús gubigue' naga zaj zra' benne' ca', na' guzre' le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. ¹⁹ Chee le na' le chjaca, le cheajchálajle benne' zaj zre'e du ca naca xezr la xu nigá, ne le cheajsédene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. ²⁰ Le guséde-ne' xelaque' wezúa dizra' ca naca da ba gunná be'eda' le'e, na' neda' tu súalezqueza' le'e xúgutę zra cadxa cheajsé chee xezr la xu nigá. ¡Ca'an gaca na!

**Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

80626b72-93df-58ae-9f5e-9d86733fab46